

इतिहासया न्हापांगु सफू म्हसीका

शमूएल व जुजुपिनिगु सफुलिइ च्वयातःगु धटनाया खँ अप्वः यानाः इतिहासया सफुलिइ नं च्वयातःगु दु, तर च्वमिं भचा पाकः च्वःगु दु। इतिहासया सफुलिइ जुजुपिनिगु इतिहासया खँ मू निगू तातुनां च्वःगु दु –

१. इस्राएल व यहूदा देशय् विपत्तित वःगु जूसां परमेश्वरं इस्राएली जातियात ब्यूगु बचं पूर्वका च्वनादीगु दु व थःमनूतयगु निंति थःगु ग्वःसायात यहूदा देशय् च्वनाच्चंपिपाखें सुथां लाका च्वनादीगु दु धइगु क्यनेत। थ्व खँया लिधंसाकथं च्वमिं दाऊद व सोलोमनं याःगु ततःधंगु ज्या, यहोशापात, हिजकियाह व योशियाह जुजुपिन्सं याःगु भिके ज्या अले परमेश्वरयात विश्वास यायेबहः जूपिं मनूतयत स्वइ।

२. यरूशलेमया देगलय् परमेश्वरया आराधना गथे यानाः शुरू जुल, अले खास यानाः आराधनाया ज्या याइपि पुजाहारीत व लेवीतयगु व्यवस्था गय् च्वं धकाः क्यनेत। देगः दयकूम्ह सोलोमन खःसां दाऊदयात देगः व अन याइगु आराधना विधि थापं याःम्ह कथं क्यनातःगु दु।

न्हापांगु व निगूगु इतिहासया सफू एज्रां च्वःगु खः धकाः यहूदीतयगु धापू दु। थुपि सफूत ई.पु. ४५० निसें ४२५ या दथुइ च्वःगु खः।

धलः पौ

वंशावली व नां धलः १:१–१:४४

शाऊल सीगु १०:१–१४

दाऊदं शासन याःगु

१. ज्या पूर्वगु व कष्टत ११:१–२२:१

२. देगः दयकेत तयार याःगु २२:२–२९:३०

१ इतिहास

आदमनिसें नोआया सन्तान तक

1 आदम, शेत, एनोश,

2 केनान, महलालेल, यैरेद

- 3 हनोक, मतूशेलह, लेमेक व नोआ।
 4 नोआया कायपि – शेम, हाम व येपेत खः।

येपेतया सन्तान

- 5 येपेतया कायपि – गोमेर, मागोग, मादे, यावान, तूबल, मेशेक व तीरास खः।
 6 गोमेरया कायपि – अशकनज, रीपत व तोगर्मा खः।
 7 यावानया कायपि – एलीशाह, तर्शीश, किर्तीम व रोदानीम मनूत खः।

हामया सन्तान

- 8 हामया कायपि – कूश, मिश्रइम, पूत व कनान खः।
 9 कूशया कायपि – सेबा, हवीला, सब्त, रामाह व सब्तका खः। रामाहया कायपि – शेबा व ददान खः।
 10 कूश निम्रोदया बाः खः, निम्रोद पृथ्वीइ न्हापांम्ह वीर खः।
 11 मिश्रइम धाःसा लूदीत, अनामीत, लहाबीत व नप्तूहीत,
 12 पन्तूसीत, कस्तलूहीत (पलिश्तीत थुपिपाखें वःपि खः) व कप्तोरीतय् पुर्खा खः।
 13 कनान वया जेठाम्ह काय सीदोन, हितीत,
 14 यबूसीत, एमोरीत, गिर्गाशीत,
 15 हिब्वीत, अरकीत, सिनीत,
 16 अर्वादीत, समारीत व हमातीतय् नं बाः खः।

शेमया सन्तान

- 17 शेमया कायपि – एलाम, अश्शूर, अर्पक्षद, लूद व अराम खः। आरामया कायपि – ऊज, हुल, गेतेर व मेशेक खः।
 18 अर्पक्षद शेलहया बाः खः, अले शेलह एबेरया बाः खः।
 19 एबेरया* निम्ह कायपि दु, छम्ह काययागु नां पेलेग खः, छायाधाःसा वयागु इलय् पृथ्वीयात ब्वथःगु खः। मेम्ह काययागु नां योक्तान खः।
 20 योक्तान अल्मोदद, शेलेप, हसर्मवित, येरह,
 21 हदोरम, ऊजाल, दिक्ला,
 22 ओबाल, अब्माएल, शेबा,
 23 ओपीर, हवीला व योबाबया बाः खः। थुपि सकलें योक्तानया कायपि खः।
 24 शेमानिसें अब्राहाम तकया वंश थुपि हे खः – शेम, अर्पक्षद, शेलह,
 25 एबेर, पेलेग, रऊ,

* 1:19 १:१९ एबेर पेलेगया अर्थ ब्वथःगु

26 ससृग्, नाहोर, तेरह,

27 अले अब्राम (अब्रामयात अब्राहाम नं धाः)।

अब्राहामया सन्तान

28 अब्राहामया काय्पि इसहाक व इश्माएल खः।

29 इश्माएलया काय्पि इवःलिक थुपि हे खः – जेठाम्ह नबायोत अनलिपा केदार, अदबेल, मिब्साम,

30 मिश्मा, दुमा, मस्सा, हदद, तेमा,

31 यतूर, नापीश व केदमा। थुपि इश्माएलया काय्पि खः।

कतूराया सन्तान

32 अब्राहामया कतूरा धाःम्ह छम्ह मथ्याःम्ह कलाः दु। वं जिम्नान, योक्षान, मदान, मिघान, यिशबाक व शूहयात बुइकल। योक्षानया काय्पि – शेबा व ददान खः।

33 मिघानया काय्पि – एपा, एपेर, हानोक, अबीदा व एल्दा खः। थुपि सकलें कतूराया सन्तान खः।

इसहाकया सन्तान

34 अब्राहाम इसहाकया बाः खः। इसहाकया काय्पि – एसाव व इस्राएल।

एसावया सन्तान

35 एसावया काय्पि – एलीपज, रुएल, येऊश, यालाम व कोरह खः।

36 एलीपजया काय्पि – तेमान, ओमार, सपो, गालाम, कनज व अमालेक खः। अमालेक धाःसा तीम्नपाखें दुम्ह खः।

37 रुएलया काय्पि – नहत, जेरह, शम्मा व मिज्जा खः।

एदोमय् सेइरयापि मनूत

38 सेइरया काय्पि – लोतान, शोबाल, सिबोन, अना, दीशोन, एसेर व दीशान खः।

39 लोतानया काय्पि – होरी व हेमाम खः। लोतानया केहें तीम्न खः।

40 शोबालया काय्पि – अल्बान, मानहत, एबाल, शपो व ओनाम खः। सिबोनया काय्पि – अय्या व अना खः।

41 अनाया काय् दीशोन खः। दीशोनया काय्पि – हेमदान, एश्वान, यित्रान व करान खः।

42 एसेरया काय्पि – बिल्हान, जावान व अकान।

दीशानया काय्पि – ऊज व आरान खः।

एदोमया शासकत

43 इस्राएल्य जुजु दये न्ह्यः एदोमय् शासन याःपि जुजुपि थुपि हे खः — बओरया काय् बेला, अले वयागु शहर दिन्हावा खः।

44 बेला सीधुंकाः बोझायाम्ह जेरहया काय् योबाब जुजु जुल।

45 योबाब सीधुंकाः तेमानीतय्गु देशयाम्ह हशाम जुजु जुल।

46 हशाम सीधुंकाः बददया काय् हदद जुजु जुल। वं मोआब देशय् मिघानीतयत् बुकल। वयागु शहर अवीत खः।

47 हदद सीधुंकाः मास्रेकायाम्ह सम्ला जुजु जुल।

48 सम्ला सीधुंकाः यूफ्रेटिस खुसिया सिथय् च्वंगु रहोबेतयाम्ह शौल जुजु जुल।

49 शौल सीधुंकाः अक्बोरया काय् बाल-हानान जुजु जुल।

50 बाल-हानान सीधुंकाः हदद जुजु जुल। वया शहरया नां पाऊ खः। वया कलाःया नां महेतबेल खः गुम्ह मन्नेदया म्हाय् व मे-जहाबया छय् खः।

51 हदद नं सित।

एदोमयापि नायःत थुपि हे खः — तीम्न, अल्वा, यतेत,

52 ओहोलीबामा, एलाह, पीनोन,

53 कनज, तेमान, मिब्सार,

54 मग्दीएल व ईराम खः। एदोमयापि नायःत थुपि हे खः।

2

इस्राएलया काय्पि

1 इस्राएलया काय्पि — रूबेन, शिमियोन, लेवी, यहदा, इस्साखार, जबूलून,

2 दान, योसेफ, बेन्यामीन, नप्ताली, गाद व आशेर खः।

यहदाया काय्पि

3 यहदाया काय्पि — एर, ओनान व शेलह खः। थुपि स्वम्हयसिया मां कनानी मिसा शूआ खः। यहदाया दकलय् तःधिकःम्ह काय् एम् मभिम्ह मनू जूगुलि परमप्रभुं वयात स्यानादिल।

4 यहदाया भौ तामारं वयागु लागिं फारेस व जेरहयात बुइकल। फुक्क यानाः यहदाया न्याम्ह काय्पि — दत।

5 फारेसया काय्पि — हेस्रोन व हामूल खः।

6 जेरहया न्याम्ह काय्पि दु। इपि जिम्नी, एतान, हेमान, कलकोल व दर्दा खः।

7 कर्मीया काय् आकान खः। आकानं काये मज्यू धयातःगु देछायेमाःगु चिज कयाः इस्राएलीतयथाय् विपत्ति हःगु खः।

8 एतानया काय् अजर्याह खः।

9 हेस्रोनाया काय्पि — यरहमेल, राम व कालेब खः।

हेस्रोन्निसैं दाऊद तक

10 राम अम्मीनादाबया बाः खः, अले अम्मीनादाब नहशोनया बाः खः। नहशोन यहदायापि मनूतय् नायः खः।

11 नहशोन सल्मोनया बाः खः। सल्मोन बोअजया बाः खः।

12 बोअज ओबेदया बाः खः। अले ओबेद यिशैया बाः खः।

13 यिशैया न्हयम्ह काय्पि दु, जेठाम्ह एलीआब व माइलाम्ह अबीनादाब, साहिल्लाम्ह शिमेअ,

14 कार्हिल्लाम्ह नतनेल, न्याम्हम्ह रौदै,

15 खुम्हम्ह ओसेम व कान्छाम्ह दाऊद।

16 इमि केहेंपि सस्याह व अबीगेल खः। सस्याहया स्वम्ह काय्पि दु। इपि अबीशै, योआब व असाहेल खः।

17 अबीगेल अमासाया मां खः, अमासाया बाः इश्माएली येतेर खः।

हेस्रोनाया मेपि सन्तान

18 हेस्रोनाया काय् कालेबया अजूबा धाःम्ह मिसापाखें व यरीअतपाखें मस्त दत। इमि काय्पि — येशेर, शोबाब व अर्दोन खः।

19 अजूबा सीधुंकाः कालेबं एप्रातयात ब्याहा यात, वं हरयात बुइकल।

20 हर ऊरीया बाः खः। ऊरी बजलेलया बाः खः।

21 लिपा हेस्रोन खुइदें दुबलय् वं गिलादया बाः माकीरया म्हायल्सिसे ब्याहा यात, इमि काय् सगूब खः।

22 सगूब याईरया बाः खः। याईर गिलादय् च्वंगु निइस्वंगू शहर त्याका काल।

23 तर गशूर व अरामं इमिगुपाखें हब्बात-याईर व केनातयात उकिया जःखः च्वंगु खुइगू शहरनापं त्याका काल। थुपि सकले गिलादया बाः माकीरया सन्तान खः।

24 हेस्रोन कालेब-एप्राताया शहरय् सीधुंकाः वया कलाः अबियां वया काय् अशहरयात बुइकल। अशहर तकोया बाः खः।

हेस्रोनाया काय् यरहमेलया सन्तान

25 हेस्रोनाया तःधिकःम्ह काय् यरहमेलया काय्पि – तःधिकःम्ह राम, बूना, ओरेन, ओसेम व अहियाह खः।

26 यरहमेलया अतारा धाःम्ह मेम्ह छम्ह कलाः दु। व ओनामया मां खः।

27 यरहमेलया तःधिकःम्ह काय् रामया काय्पि – मास, यामीन व एकेर खः।

28 ओनामया काय्पि – शम्मै व यादा खः। शम्मैया काय्पि – नादाब व अबीशूर खः।

29 अबीशूरया कलाःया नां अबीहेल खः। वं अहबान व मोलीदयात बुइकल।

30 नादाबया काय्पि – सेलेद व अप्पेम खः। सेलेद मस्त मदयकं हे सित।

31 अप्पेमया काय् यिशी खः। यिशीया काय् शेशान खः। शेशानया काय् अहलैया खः।

32 शम्मैया किजा यादाया काय्पि – येतेर व जोनाथन खः। येतेर मस्त मदयकं हे सित।

33 जोनाथनया काय्पि – पेलेथ व जाजा खः। यरहमेलया सन्तान थुपि हे खः।

34 शेशानया काय्पि – मद्दु, म्हाय्पि जक दु। वया यरहा धाःम्ह छम्ह मिश्री दास दु।

35 ध्व हे दास यरहानां शेशानं थःम्हाय्यात ब्याहा यायेत बिल, अले वं अतैयात बुइकल।

36 अतै नातानया बाः खः। नातान जाबादया बाः खः।

37 जाबाद एपलालया बाः खः। एपलाल ओबेदया बाः खः।

38 ओबेद येह्या बाः खः। येह् अजर्याहया बाः खः।

39 अजर्याह हेलेसया बाः खः। हेलेस एलासाया बाः खः।

40 एलासा सिस्मैया बाः खः। सिस्मै शल्लूमया बाः खः।

41 शल्लूम यकम्याहया बाः खः। यकम्याह एलीशामाया बाः खः।

हेस्रोनाया काय् कालेबया सन्तान

42 यरहमेलया किजा कालेबया तःधिकःम्ह काय् मेशा खः। मेशा जीपया बाः खः, जीप मारेशाया बाः खः। मारेशाया काय् हेब्रोना खः।

43 हेब्रोनाया काय्पि – कोरह, तप्पूह, रेकेम व शेमा खः।

44 शेमा रहमया बाः खः। अले रहम योर्कामया बाः खः। रेकेम शम्मैया बाः खः।

45 शम्मैया काय् माओन खः, अले माओन बेथ-सरया बाः खः।

46 कालेबया मथ्याःम्ह कलाःया नां एपा खः। एपा हारान, मोस व गाजेजया मां खः। हारान गाजेजया बाः खः।

47 यहदैया काय्पि — रेगेम, योताम, गेशान, पलेत, एपा व शाप खः।

48 कालेबया मेह् मथ्याःम्ह कलाःया नां माका खः। माका शेबेर व तिर्हानाया मां खः।

49 वं मद्रुमन्नाया बाः शापयात अले मक्बेना व गिबियाया बाः शेबालेयात नं बुइकल। कालेबया म्हाय् अक्सा खः।

50 कालेबया सन्तान थुपि नं खः — हर कालेबया तःधिकःम्ह काय् खः, वयात एप्रातां बुइकूगु खः। हरया काय्पि — किर्यत-यारीम पलिस्था याःम्ह शोबाल,

51 बेथलेहेम पलिस्था याःम्ह सल्मा व बेथ-गादेर पलिस्था याःम्ह हारेप खः।

52 किर्यत-यारीम पलिस्था याःम्ह शोबालया सन्तान हारोए, बच्छि मानहतीत व

53 किर्यत-यारीमया वंशत अथे धइगु यित्रीत, पृथीत, शुमातीत व मिश्रातीत खः। थुपिपाखें सोराती व एशतोलीतय् सन्तान दत।

54 सल्माया सन्तान बेथलेहेमयापि मनूत, नतोपातीत, अत्रोतबेथ-योआब, बच्छि मानहतीत व सोरीत अले

55 याबेसय् च्वपि शास्त्रीतय् सन्तान तिरातीत, शिम्मतीत व सुकातीत खः। थुपि केनीत खः। इपि रेकाबया घरानायाम्ह हम्मतया सन्तान खः।

3

दाऊदया काय्पि

1 हेब्रोन्य् बूपि दाऊदया काय्पि थुपि हे खः — तःधिकःम्ह काय् अमनोन, थ्वया मां यिजरेलयाम्ह अहीनोम खः। माइलाम्ह दानिएल, थ्वया मां कर्मेलयाम्ह अबीगेल खः।

2 साइलाम्ह काय् अब्शालोम, थ्वया मां गशूरयाम्ह जुजु तल्मैया म्हाय् माका खः। काइलाम्ह अदोनियाह, थ्वया मां हग्गीत खः।

3 न्याम्हम्ह शपत्याह, थ्वया मां अबीतल खः। अले चिधिकःम्ह यित्राम, थ्वया मां दाऊदया कलाः एला खः।

4 हेब्रोन्य् दाऊदया खुम्ह काय्पि दत। अन वं न्हय्दँ व खुला राज्य यात।

यस्शलेमय् वं स्विस्वदँ राज्य यात।

5 यस्शलेमय् अम्मीएलया म्हाय् बतशेबापाखें प्यम्ह काय्पि बुल- शम्मूअ, शोबाब, नातान व सोलोमन। थुपि पेम्हसित अम्मीएलया म्हाय् बतशेबां बुइकूगु खः।

6 वया मेपि गुम्ह काय्पि नं दु। थुपि यिभार, एलीशूअ, एलीपिलेत,

7 नोगह, नेपेग, यापी,

8 एलीशामा, एल्यादा व एलीपिलेत खः।

9 थुपि सकलें दाऊदया काय्पि खः। थुमित त्वःताः दाऊदया मथ्याःपि कलाःपिनिपाखें नं मस्त दु। इमि क्यहें तामार खः।

यहदाया जुजुपि

10 सोलोमनया काय् रहबाम खः, रहबामया काय् अबिया खः, अबियाया काय् आसा खः, आसाया काय् यहोशापात खः,

11 यहोशापातया काय् यहोराम खः, यहोरामया काय् अहज्याह खः,
अहज्याहया काय् योआश खः,

12 योआशया काय् अमस्याह खः, अमस्याहया काय् अजर्याह खः, अजर्याहया काय् योताम खः,

13 योतामया काय् आहाज खः, आहाजया काय् हिजकिया खः, हिजकियाया काय् मनश्शे खः,

14 मनश्शेया काय् अमोन खः, अमोनया काय् योशियाह खः।

15 योशियाहया काय्पि तःधिकःम्ह योहानान, माइलाम् येहोयाकीम, साइलाम् सिदकियाह, व चिधिकःम्ह शल्लूम खः।

16 यहोयाकीमया काय्पि यहोयाकीन व सिदकियाह खः।

यहोयाकीनया सन्तान

17 बेबिलोनय् ज्वनायंकूपि यहोयाकीन जुजुया काय्पि थुपि खः — शालतिएल,

18 मल्कीराम, पदायाह, शेनस्सर, यकम्याह, होशामा व नदब्याह खः।

19 पदायाहया काय्पि यस्बाबेल व शिमी खः।

यस्बाबेलया काय्पि मशुल्लाम व हनन्याह खः। इमि केहें शलोमीत खः।

20 यस्बाबेलया मेपि न्याम्ह काय्पि दु। थुपि हशूबा, ओहेल, बेरेक्याह, हसदयाह व यूशप-हेसेद खः।

21 हनन्याहया काय्पि पलत्याह व यशयाह खः। यशयाहया काय् रपायाह खः, रपायाहया काय् अर्नान खः। अर्नानया काय् ओबदिया व ओबदियाया काय् शकन्याह खः।

22 शकन्याहया सन्तान — शकन्याहया छम्ह काय् शमायाह व न्याम्ह छय्पि, हनूश, यिगाल, बरीह, नार्याह व शाफात खः।

23 नार्याहया स्वम्ह काय्पि दु। थुपि एल्योएनैया, हिस्कियाह व अज़ीकाम खः।

24 एल्यहोएनैया न्हय्म्ह काय्पि दु। थुपि होदबिया, एल्यासीब, पलयाह, अक्कूब, योहानान, दलायाह व अनानी खः।

4

यह्दाया सन्तान

1 यह्दाया सन्तान – फारेस, हेसोन, कमी, हर व शोबाल।

2 शोबालया काय् रायाह यहतया बाः खः। यहत अह्मै व लहदया बाः खः। सोरातीतय् वंश थुपि हे खः।

3 एतामया काय्पि – यिजरेल, यिशमा व यिदबश खः। इमि केहेंया नां हस्सलेलपोनी खः।

4 पनूएल गदोरया बाः खः, अले एसेर हशया बाः खः। हर एप्रातया न्हापां बूम्ह काय् खः, एप्रात बेथलेहेम शहर पलिस्था याःम्ह खः।

5 तकोया बाः अश्शुरया निम्ह कलाःपि दु। थुमिगु नां हेलह व नारा खः।

6 नारां अहुज्जाम, हेपेर, तेमेनी व हाहशतारीयात बुइकल। नाराया सन्तान थुपि हे खः।

7 हेलहया काय्पि – सेरेथ, सोहोर, एतनान व कोस खः।

8 कोस आनूब व हज्जोबेबा अले हास्मया काय् अहर्हेलया वंशतय् बाः खः।

9 याबेस थः दाजुकिजापि स्वयाः इज्जत दुम्ह खः। मांम्हय्सिनं वयात याबेस नां ब्यूगु खः। छायाःसा व बूबलय् मांम्हय्सिनं यक्व कसाः नःगु खः।

10 तर याबेसं इस्राएलयाम्ह परमेश्वरयात थथे धकाः प्रार्थना यात, “हे परमेश्वर, जितः आशिष बियादिसँ। जितः तःकूगु इलाका बियादिसँ। जिं यानागु न्हागु नं ज्याय् छि जिनापं च्वनादिसँ। जितः कसाः बीगु दुःखपाखें बचय् यानादिसँ।” अले परमेश्वरं वयागु बिन्ति न्यनादिल।

11 शूहहया किजा कबूल मेहीरया बाः खः, मेहीर एश्टोनया बाः खः।

12 एश्टोन बेथ-रापा, पसेह व तहिन्नाया बाः खः। तहिन्ना इर-नाहशया बाः खः। थुपि रेकायापि मनूत खः।

13 कनजया काय्पि – ओत्निएल व सरायाह। ओत्निएलया काय्पि – हतत व मोनोतै खः।

14 मोनोतै ओप्राया बाः खः। सरायाह योआबया बाः खः। अले योआबं गे-हरशीम* पलिस्था यात। थुकियात गे-हरशीम धाल छायाःसा अन ज्या सःपि

* 4:14 ४:१४ गे-हरशीम थुकिया अर्थ शिल्पकारतय्गु ब्यासि खः

शिल्पकारत च्वनीगु खः।

15 यपुन्नेया काय् कालेबया काय्पिं – ईरू, एलाह व नआम खः। एलाहया काय् कनज खः।

16 यहललेलया काय्पिं – जीप, जीपा, तीरया व असरेल खः।

17 एज्रहया काय्पिं – येतेर, मेरेद, एपेर, यालोन खः। मेरेद ब्याहा याःम्ह फारोया म्हाय् बित्याहं मिरियम, शम्मै व म्हाय् बित्याहं मिरियम, शम्मै व एशतमोया बाः यिशबहलयात बुइकल।

18 मेरेदया मेम्ह यहदी कलाः धाःसा गदोरया बाः येरेद, सोखोया बाः हेबेर व जानोहया बाः यक्तीएलया मां खः।

19 होदियाहया कलाः नहमया केहेंया काय्पिं – गेरेमी कीलाहया बाः व माकाती एशतमो खः।

20 शिमोनया काय्पिं – अमनोन, रिन्ना, बेन-हानान व तीलोन खः। यिशीया काय्पिं – जोहेत व बेन-जोहेत खः।

21 यहदाया काय् शेलहया काय्पिं – लेकाया बाः एरू, मारेशाया बाः लादा अले बेथ-अशबेयाय् च्वपिं मलमलया कापः दयकिपिनि वंश,

22 योकीम, कोजेबाय् च्वपिं मनूत अले योआश व साराप गुम्ह मोआब व यशूबी-लेहेमय् शासन याइम्ह खः। थुपि नां धलः तसकं पुलांगु खः।

23 थुपि नतैम व गदेराय् च्वनिपि कुमाःत खः। अले अन जुजुनापं च्वनाः जुजुयागु ज्या याइगु खः।

शिमियोनया सन्तान

24 शिमियोनया सन्तान नमूएल, यामीन, यारीब, जेरह व शौल खः।

25 शौलया काय् शल्लूम खः। शल्लूमया काय् मिब्साम खः। मिब्सामया काय् मिश्मा खः।

26 मिश्माया सन्तान हम्मूएल, जक्कूर व शिमी खः।

27 शिमीया झिंखुम्ह काय्पिं – व खुम्ह म्हाय्पिं दु। तर वया किजापिनि यक्व मस्त मदु। उकिं शिमियोनया वंशयापिं मनूतयगु ल्याः यहदाया वंशयापिं मनूतयगु ल्याः ति मदु।

28 इपिं च्वनीगु थाय् बेर्शेबा, मोलादा, हसर-शूआल,

29 बिल्हा, एसेम, तोलद,

30 बतूएल, होर्मा, सिक्लग,

31 बेथ-मर्काबोत, हसर-शूसीम, बेथ-बिरी व शरैम खः। दाऊदं शासन मयाःतले इमिगु शहरत थुपि हे खः।

32 इमिगु बस्तीत एताम, ऐन, रिम्मोन, तोकेन व आशान धाःगु न्यागू शहरत

33 व बालात तक हे थुपि शहरया जःखः च्वंगु गांत। इपि च्वनीगु थाय् थुपि हे खः। अले थ्व इमिगु वंशावली खः।

34 शिमियोनया मेपि सन्तान – मशोबाब, यम्लेक, अमस्याहया काय् योशा,

35 योएल, योशिब्याहया काय् येह, सरायाहया छय् व असीएलया छुइ खः।

36 एल्योएनै, याकोबा, याशोहायाह, असायाह, अदीएल, यसीमीएल, बनायाह,

37 अले शिपीया काय् जीजा, अल्लोनया छय् यदायाह, शिम्री व शमायाहया सन्तानत खः।

38 च्वय् नां च्वयातःपिं मनूत इमि थथःगु वंशयापिं नायःत खः। इमि मचाखाचातयगु ल्याः अप्वयावन।

39 अले इपिं थः पशुतयगु निंति ज्वयेगु थाय् मामां बैसीया पुर्बपाखे गदोरया लिक्क तक वन।

40 इमिसं यक्व घाँय् दुगु बांलाःगु ख्यः लुइकल। इमिसं अन यक्व बांलाःगु व भिंगु थाय् लुइकल। देश तसकं तःकू सुनसान व शान्त। न्हापा अन हाम वंशयापिं मनूत च्वनीगु खः।

41 च्वय् नां च्वयातःपिं मनूत यहदाया जुजु हिजकियाया इलय् वयाः हाम वंशयापिं च्वनीगु थाययात व अन दुपिं मोनी जातियापिन्त भज्यंक नाश यानाबिल। इमिसं इमिगु नां तक ल्यं मदय्क इमित नाश यानाबिल। इपिं इमिगु थासय् च्वन, छायाधाःसा अन फै-च्वलय् ज्वयेत ख्यः दु।

42 न्यासःम्ह शिमियोनीत पुर्बपाखे एदोमय् वन। यिशीया काय्पिं – पलत्याह, नार्याह, रपायाह व उज्जीएल इमि न्ह्यलुवाः खः।

43 इमिसं अन एदोमय् बचय्जूपिं सकल अमालेकीतय्त् स्यानाबिल, अले थौं तक नं इपिं अन च्वनाच्वंगु दु।

5

रूबेनया सन्तान

1 इस्राएलया* न्हापां बूम्ह काय् रूबेन खः। अयनं वं थः बाःया छम्ह मथ्याःम्ह कलाःलिसे घनाः थः बाःयात हेपय् याःगुलि न्हापां बूम्ह काय्या अधिकार वया

* 5:1 ५:१ इस्राएल वया मेगु नां याक्व खः

किजा योसेफया काय्पिन्त बिल। उकिं वंशावलीइ स्बेनया नां तःधिकःम्ह काय् कथं च्वयातःगु मदु।

2 यहदा थः दाजुकिजापि मध्ये बल्लाःम्ह खःसां अले वया सन्तानपाखें हे शासक वःसां तःधिकःम्ह काय्या अधिकार योसेफयागु हे जुल।

3 इस्राएलया तःधिकःम्ह काय् स्बेनया काय्पि – हानोक, पल्लु, हेस्रोन व कर्मी खः।

4 योएलया सन्तानतय्गु नां थथे दु – शमायाह योएलया काय् खः। गोग शमायाहया काय् खः। शिमी गोगया काय् खः।

5 मीका शिमीया काय् खः। रायाह मीकाया काय् खः। बाल रायाहया काय् खः।

6 बालया काय् बीरहयात अशशूरयाम्ह जुजु तिग्लत-पिलेसेरं ज्वना यंकल। बीरह छम्ह स्बेनीतय् नायः खः।

7 वंशावलीइ स्बेन कुलया वंश वंशयापि नायःत थुपि खः धकाः च्वयातःगु दु – नायःम्ह यीएल, जकरिया

8 व बेला। बेला अजाजया काय् खः। अजाज शेमाया काय् खः। शेमा योएलया काय् खः। इपि अरोएय् व अनं उत्तरय् नेबो व बाल-मोन तक च्वनीगु खः।

9 गिलादय् इमि सा द्वहंतय्गु ल्याः अप्वया वंगुलि इमिसं व देशया पुर्बपाखे मरुभूमि तकया छगू इलाका कब्जा यात। मरुभूमि यफ्रेटिस खुसि तक न्यनावंगु दु।

10 शाऊल जुजु जुयाच्चवंबलय् इमिसं लडाइँ यानाः हग्रीतय्त् बुकल। अले इमिसं गिलादया पुर्बयागु हग्रीत च्वनीगु देशय् च्वंवन।

गादया सन्तान

11 गादीत स्बेनीतय् लिक्कसं च्वन। गादीत सलका शहर तक हे बाशानय् इमिगु लिक्कसं च्वन।

12 बाशानय् योएल न्हापांम्ह नायः खः, वया लिपायाम्ह नायः शापाम खः। अले यानै व शाफात नायः जुल।

13 परिवारकथं इमि न्हयम्ह थःथितिपि थुपि हे खः – मिखाएल, मशुल्लाम, शेबा, यौरै, यकान जीआ व एबेर।

14 इपि अबीहेलया सन्तान खः। अबीहेल हरीया काय् खः। हरी यारोहया काय् खः। यारोह गिलादया काय् खः। गिलाद मिखाएलया काय् खः। मिखाएल यशीशैया काय् खः। यशीशै यहदोया काय् खः। यहदो बूजया काय् खः।

15 गुनीया काय् अब्दीएल खः। अब्दीएलया काय् अही खः। अही इमि परिवारयाम्ह मू मनू खः।

16 इपि गिलाद व बाशान इलाकाया शहर शहरय् व शारोनयागु फुक्क पशु ज्वयेगु थासय् च्वन।

17 थुपि सकसिगु वंशावली यहदायाम्ह जुजु योताम व इस्राएलयाम्ह जुजु यारोबामया पालय् च्वःगु खः।

यर्दनया पुर्बपाखे च्वंपि

18 रुबेन, गाद व बच्छि मनश्शे कुलय् ढाल, तरवार व धनुष वाण चले यायेगु तालिम काये धुंकूपि ४४,७६० म्ह सिपाईत दु।

19 इमिसं हग्रीत, यतूर, नापीश व नोदाबनापं लडाईं यात।

20 इमिसं ग्वाहालिया लागि परमेश्वरयात प्रार्थना यात। इमिसं परमेश्वरयाके भलसा तःगुलि वयकलं इमित ग्वाहालि बियादिल। परमेश्वरं हग्रीत व इपिनापं मिलय् जूपि सकसितं इमिगु ल्हातय् लाकादिल।

21 इमिसं इमि नेयद्रुःम्ह ऊँट, निगू लाख व नेयद्रुःम्ह फै व निद्रुःम्ह गधा कब्जा यात। अले छगू लाखम्ह मनूतय्त ज्वन।

22 इमिसं यक्व शत्रुतय्त स्यात, छायाःसा थ्व लडाईलय् परमेश्वर हे इमिगु विरोधय् ल्वानादीगु खः।

मनश्शेया बच्छि कुल

23 हानं मनश्शेया बच्छि कुलयापि मनूत उगु हे देशय् बाशाननिसें कयाः बाल-हेर्मोन, अथे धइगु सेनीर (हेर्मोन डाँडा) तक च्वन, अले इमिगु ल्याः यक्व दु।

24 इमि परिवारयापि मू मनूत एपेर, यिशी, एलीएल, अज्जीएल, यर्मिया, होदबिया व यहदीएल खः। थुपि फुक्क तसकं बल्लाःपि, नांजाःपि व इमि परिवारया नायःत खः।

25 तर इमिसं थः पुर्खातय् परमेश्वरया विरोधय् विश्वासघात यात। इमिसं परमेश्वरं नाश यानादीपि अन च्वंपि मनूतय् घःतय्त पुजा याना हल।

26 उकिं परमेश्वरं अश्शूरयाम्ह जुजु पूलयात (थ्वयात तिग्लत-पिलेसेर धकाः नं धाः) ग्वाकादिल। वं रुबेन, गाद व मनश्शेया बच्छि कुलयापि मनूतय्त ज्वना यंकल। वं इमित हलह, हाबोर, हारा व गोजान खुसिया सिथय् यंकल, अन इपि थौं तक नं च्वनाच्वंगु दनि।

6

लेवीया सन्तान

- 1 लेवीया काय्पि — गेशोर्न, कहात व मरारी खः।
- 2 कहातया काय्पि — अग्राम, यिसहार, हेब्रोन व उज्जीएल खः।
- 3 अग्रामया मस्त हारून, मोशा व मिरियम खः।
हारूनया काय्पि — नादाब, अबीहू, एलाजार व ईतामार खः।
- 4 एलाजार पीनहासया बाः खः। पीनहास अबीशूया बाः खः।
- 5 अबीशू बुक्कीया बाः खः। बुक्की उज्जीया बाः खः।
- 6 उज्जी जरयाहया बाः खः। जरयाह मरायोतया बाः खः।
- 7 मरायोत अमर्याहया बाः खः। अमर्याह अहीतूबया बाः खः।
- 8 अहीतूब सादोकया बाः खः। सादोक अहीमासया बाः खः।
- 9 अहीमास अजर्याहया बाः खः। अजर्याह योहानानया बाः खः।
- 10 योहानान अजर्याहया बाः खः।
(श्व अजर्याहं यरूशलेमय् सोलोमनं दयकूगु परमप्रभुया देगलय् पुजाहारीया ज्या याइगु खः।)
- 11 अजर्याह अमर्याहया बाः खः। अमर्याह अहीतूबया बाः खः।
- 12 अहीतूब सादोकया बाः खः। सादोक शल्लूमया बाः खः।
- 13 शल्लूम हिल्कियाहया बाः खः। हिल्कियाह अजर्याहया बाः खः।
- 14 अजर्याह सरायाहया बाः खः। सरायाह यहोसादाकया बाः खः।
- 15 परमप्रभुं नबूकदनेसरपार्वे यहूदा व यरूशलेमयापि मनूतय्त देशं पितिना यंकूबलय् यहोशापातयात नं पितिनायंकूगु खः।
- 16 लेवीया काय्पि — गेशोर्न, कहात व मरारी खः।
- 17 गेशोर्नया, काय्पिनिगु नां लिब्नी व शिमी खः।
- 18 कहातया काय्पि — अग्राम, यिसहार, हेब्रोन व उज्जीएल खः।
- 19 मरारीया काय्पि — महली व मूशी खः।
इमि बाःपिनि वंशकथं धलखय् च्वयातःगु लेवीया वंशत थुपि हे खः —
- 20 गेशोर्नया वंश थुपि खः — लिब्नी गेशोर्नया काय् खः। येहाथ लिब्नीया काय् खः। जिम्माह येहाथया काय् खः।
- 21 योआ जिम्माहया काय् खः। इद्रो योआया काय् खः। जेरह इद्रोया काय् खः।
यातरै जेरहया काय् खः।
- 22 थुपि कहातया सन्तान खः — अम्मीनादाब कहातया काय् खः। कोरह अम्मीनादाबया काय् खः। अस्सीर कोरहया काय् खः।

23 एल्काना अस्सीरया काय् खः। एब्बासाप एल्कानाया काय् खः। अस्सीर एब्बासापया काय् खः।

24 तहत अस्सीरया काय् खः। उरीएल तहतया काय् खः। उज्जियाह उरीएलया काय् खः। शौल उज्जियाहया काय् खः।

25 एल्कानाया काय्पि — अमासै व अहीमोत खः।

26 एहीमोतया काय् एल्काना खः। सोफै एल्कानाया काय् खः। नहत सोफैया काय् खः।

27 एलीआब नहतया काय् खः। यरोहाम एलीआबया काय् खः। एल्काना यरोहामया काय् खः। शमूएल एल्कानाया काय् खः।

28 शमूएलया काय्पि — न्हापां बूम्ह योएल व मेम्ह अबिया खः।

29 मरारीया सन्तान थुपि खः — महली मरारीया काय् खः। लिब्नी महलीया काय् खः। शिमी लिब्नीया काय् खः। उज्जाह शिमीया काय् खः।

30 शिमेअ उज्जाहया काय् खः। हगियाह शिमेअया काय् खः। असायाह हगियाहया काय् खः।

देगल्य् बाजं थाइपि

31 बाचाया सन् परमप्रभुया पवित्र पालय् तयेधुंकाः अन भजन हालेत व बाजं थायेत दाऊद जुजुं थुपि मनूतयत् जिम्मा ब्यूगु खः।

32 इमिसं यरूशलेमय् सोलोमन जुजुं परमप्रभुया देगः मदंतलय् नापलायेगु पालय् संगीतपाखें सेवा याइगु खः। इमिसं इमिगु निंति दय्काब्यूगु नियमकथं थथःगु ज्या याइगु।

33 थःकाय्पिलिसें मिलय् जुयाः सेवा याइपि मनूत थुपि हे खः —

कहात वंशयाम्ह म्ये स्यनीम्ह हेमान। हेमान योएलया काय् खः। योएल शमूएलया काय् खः।

34 शमूएल एल्कानाया काय् खः। एल्काना यरोहामया काय् खः। यरोहाम एलीएलया काय् खः। एलीएल तोहया काय् खः।

35 तोह सूपया काय् खः। सूप एल्कानाया काय् खः। एल्काना महतया काय् खः। महत अमासैया काय् खः।

36 अमासै एल्कानाया काय् खः। एल्काना योएलया काय् खः। योएल अजर्याहया काय् खः। अजर्याह सपन्याहया काय् खः।

37 सपन्याह तहतया काय् खः। तहत अस्सीरया काय् खः। अस्सीर एब्बासापया काय् खः। एब्बासाप कोरहया काय् खः।

38 कोरह यिसहारया काय् खः। यिसहार कहातया काय् खः। कहात लेवीया काय् खः। लेवी इस्राएलया काय् खः।

39 हेमानया न्हापांम्ह ग्वाहालिमि आसाप खः। आसाप बेरेक्याहया काय् खः। बेरेक्याह शिमेअया काय् खः।

40 शिमेअ मिखाएलया काय् खः। मिखाएल बासेयाहया काय् खः। बासेयाह मल्कियाहया काय् खः।

41 मल्कियाह एत्नीया काय् खः। एत्नी जेरहया काय् खः। जेरह अदायाहया काय् खः।

42 अदायाह एतानया काय् खः। एतान जिम्माहया काय् खः। जिम्माह शिमीया काय् खः।

43 शिमी यहतया काय् खः। यहत गेशोर्नया काय् खः। गेशोर्न लेवीया काय् खः।

44 हामानया निम्हम्ह ग्वाहालिमि मरारी कुलयाम्ह एतान खः। एतान कीशीया काय् खः। कीशी अब्दीया काय् खः। अब्दी मल्लूकया काय् खः।

45 मल्लूक हशब्ब्याहया काय् खः। हशब्ब्याह अमस्याहया काय् खः। अमस्याह हिल्कियाहया काय् खः।

46 हिल्कियाह अम्सीया काय् खः। अम्सी बानीया काय् खः। बानी शेमेरया काय् खः।

47 शेमेर महलीया काय् खः। महली मूशीया काय् खः। मूशी मरारीया काय् खः। मरारी लेवीया काय् खः।

48 इमि लेवी थःथितितयूत परमेश्वरया नापलायेगु पालया मेगु ज्याया लागि ल्यःगु खः।

हारूनया सन्तान

49 अयनं हारून व वया सन्तानतयूत जक होमबलिया वेदीइ होमबलि छायेगु व गुँगू थनेगु वेदीइ गुँगू थनेगु अनुमति दु। महा-पवित्र थासय् याइगु फुक्क आराधनाया ज्या व फुक्क इस्राएलया पाप प्रायश्चित यायेत होमबलि छायेगु ज्या इमिगु जिम्माय् खः। परमेश्वरया दास मोशां ब्यूगु आज्ञाकथं इमिसं व फुक्क ज्या याइगु।

50 हारूनया सन्तान थुपि खः —

एलाजार हारूनया काय् खः। पीनहास एलाजारया काय् खः। अबीशू पीनहासया काय् खः।

51 बुक्की अबीशूया काय् खः। उज्जी बुक्कीया काय् खः। जरयाह उज्जीया काय् खः।

52 मरायोत जरयाहया काय् खः। अमर्याह मरायोतया काय् खः। अहीतूब अमर्याहया काय् खः।

53 सादोक अहीतूबया काय् खः। अहीमास सादोकया काय् खः।

लेवीतयगु लागिं लागा

54 हास्नया सन्तानया कहाती वंशयात ब्यूगु इलाकाय् इमिगु बस्तीत थुपिं हे खः
— (लेवीतयत् ब्यूगु जमिनया न्हापांगु भाग कहातीतयत् दत।)

55 इमित यह्दाय् हेब्रोन् व उकिया जःखः च्वंगु पशु ज्वयेगु थायत् बिल।

56 तर शहरया जःखः च्वंगु बुँ व बस्तीत धाःसा यपुन्नेया काय् कालेबयात बिल।

57 उकिं हास्नया सन्तानतयत् पशु ज्वयेगु थाय्तनापं थुपिं शहरत बिल — हेब्रोन् (शरण शहर)☆, अले लिब्ना, यत्तीर, एश्तमो,

58 हीलन, दबीर,

59 आशान, युत्ता व बेथ-शमेश।

60 अले बेन्यामीन कुलया इलाकां गेबा, आलेमेत, अनातोत इमि पशु ज्वयेगु थाय्तनापं थुपिं शहरत बिल। कहातीया वंशतयत् झिंस्वंगू शहरत बिल।

61 कहातया ल्यंदुपिं सन्तानतयत् धाःसा मनश्शेया बच्छि कुलया इलाकां झिगू शहर बिल।

62 गेशीनया सन्तानतयत् इमि वंश वंशकथं इस्साखार, आशेर, नप्ताली व बाशानय् दुगु मनश्शे कुलया इलाकां झिंस्वंगू शहर बिल।

63 मरारीया सन्तानतयत् इमि वंश वंशकथं रुबेन्, गाद व जबूलून कुलया इलाकां झिंनिगू शहर बिल।

64 थुकथं इस्राएलीतय्सं लेवीतयत् थुपिं शहरत व उकिया पशु ज्वयेगु थाय्तनापं बिल।

65 च्वय् च्वयातःगु शहरत यह्दा, शिमियोन् व बेन्यामीन कुलया इलाकां इमित ब्यूगु खः।

66 कहातया छुं वंशतयत् एफ्राइम कुलया इलाकां छुं शहरत ब्यूगु खः।

67 इमित एफ्राइमया पहाडी देशय् शकेम (छगू शरण नगर) गेजेर,

68 योक्माम, बेथ-होरोन्,

69 अय्यालोन् व गात-रिम्मोन्, उकिया पशु ज्वयेगु थाय्तनापं बिल।

70 मनश्शेया बच्छि कुलया इलाकां इस्राएलीतय्सं आनेर व बिलाम, उकिया पशु ज्वयेगु थाय्तनापं कहातया ल्यं दुगु वंशतयत् बिल।

☆ 6:57 दः५७ गन्ती ३५:९-१५

71 गेशोनीतयत् थुपिं शहरत उकिया जःखः च्वंगु पशु ज्वयेगु थाय्तनापं ब्यूगु खः। मनश्शेया बच्छि कुलया इलाकां बाशानय् गोलान व अस्तारोत।

72 इस्साखारया इलाकां-केदेश, दाबरत,

73 रामोत व अनेम।

74 आशेरया इलाकां-माशाल, अब्दोन,

75 ह्कोक व रहोब।

76 नप्तालीया इलाकां-गालील्य केदेश, हम्मोन व किर्यातिम।

77 मरारीतयत् (लेवीतय् ल्यंदुपिन्त) पशु ज्वयेगु थाय्तनापं थुपिं शहरत बिल-जबूलनया इलाकां-योक्माम, कर्तह, रिम्मोनी व तबोर।

78 स्बेनया इलाकां यरीहोया पुर्बय् यर्दनया उखे मरूभूमिइ दुगु बेसेर, यहसाह,

79 कदेमोत व मेपात।

80 गादया इलाकां गिलादय् रामोत, महनोम,

81 हेश्बोन व याजेर।

7

इस्साखारया सन्तान

1 इस्साखारया प्यम्ह काय्पिं दु। इमिगु नां तोला, पूवा, याशूब व शिमोन खः।

2 तोलाया काय्पिं — उज्जी, रपायाह, यरीएल, यहमै, यिब्साम व शमूएल खः।

इपिं सकलें थथःगु परिवारया नायः व बहादुर सिपाईत खः। दाऊद जुजुया पालय् इमि परिवारय् २२,६०० म्ह मनूत दु।

3 उज्जीया काय् यिज्यहि खः। यिज्यहिया काय्पिं — मिखाएल, ओबदिया, योएल व यिशयाह खः। इपिं न्याम्हं हे नायःत खः।

4 इमिगु वंशावलीकथं इमिके ३६,००० म्ह सिपाईत दु। इमिगु परिवार तःधं छायाधःसा इमि यक्व मिस्त व मस्त दु।

5 वंशावलीकथं इस्साखारया फुक्क वंशय् ८७,००० म्ह बल्लाःपिं सिपाईत दु।

बेन्यामीनया सन्तान

6 बेन्यामीनया स्वम्ह काय्पिं — बेला, बेकेर व येदीएल खः।

7 बेलाया न्याम्ह काय्पिं दु। इमिगु नां यसम्बोन, उज्जी, उज्जीएल, यरीमोत व ईरी खः। इपिं थथःगु परिवारयापि मू मनूत खः।

इमिगु वंशावलीकथं इमिके २२,०३४ म्ह सिपाईत दु।

8 बेकेरया काय्पि — जमीरा, योआश, एजीएजर, एल्योएनै, ओप्पी, यरेमोत, अबिया, अनातोत व आलेमत खः। इपि सकलें बेकेरया काय्पि खः।

9 इमिगु वंशावलीया धलखय् परिवार परिवारयापि नायःत व २०,२०० म्ह सिपाइँत च्वयातःगु दु।

10 येदीएलया काय् बिल्हान खः। बिल्हानया काय्पि — येऊश, बेन्यामीन, एहद, केनाना, जेतान, तर्शीश व अहीशहर खः।

11 थुपि सकलें येदीएलया काय्पि थःथः परिवारया मू मनूत खः।

इमिके १७,२०० म्ह सिपाइँत दु। इपि सकलें सेनानां लडाइँलय् वनेत तयार दु।

12 शुप्पी व हुप्पीत इरया सन्तान खः, अले हर्शीत अहेरया सन्तान खः।

नप्तालीया सन्तान

13 नप्तालीया काय्पि — यहसेल, गुनी, येसेर व शिल्लेम खः। थुपि बिल्हाया सन्तान खः।

मनश्शेया सन्तान

14 थुपि मनश्शेया सन्तान खः — मनश्शेया मथ्याःम्ह अरामी कलाःपाखें असीएल धाःम्ह काय् दु। इमि माकीर धाःम्ह काय् नं दु। माकीर गिलादया बाः खः।

15 माकीरं हुप्पी व शुप्पीतय् छम्ह मिसालिसें ब्याहा यात। माकीरया केहँया नां माका खः। वया मेम्ह सन्तानया नां सलोफाद खः। सलोफादया म्हायपि जक दु।

16 माकीरया कलाः माकाया छम्ह काय् दु। माकां वयागु नां पेरेश तल। पेरेशया किजाया नां शेरेश खः। शेरेशया काय्पि — ऊलाम व राकेम खः।

17 ऊलामया काय् बदान खः।

थुपि गिलादया सन्तान खः। गिलाद माकीरया काय् मनश्शेया छय् खः।

18 गिलादया केहँ हम्मोलेकेतया काय्पि — ईशोद, अबीएजेर व महला खः।

19 शमीदाया काय्पि — अहियन, शकेम, लिखी व अनीआम खः।

एफ्राइमया सन्तान

20 एफ्राइमया सन्तान थुपि खः। एफ्राइमया काय् शूतेहल खः। शूतेहलया काय् बेरद खः। बेरदया काय् तहत खः। तहतया काय् एलादा खः। एलादाया काय् तहत खः।

21 तहतया काय् जाबाद खः। जाबादया काय् शूतेहल खः। एफ्राइमया मेपि काय्पि — एसेर व एलादयात गादयापि मनूतय्सं इमि सा द्रुहं खुयाकायेत वंबलय् स्यानाबिल।

22 अथे जुयाः इमि बाः एफ्राइम तःन्हु तक इमिगु लागि नुगः मछिंका च्वन। अले वयात ह्येकेत वयाः थःथितित वल।

23 अनंलि एफ्राइम थः कलाःलिसे घन। अले वया कलाःया प्वाथय् दत। वं छम्ह काय् बुइकल। थःगु परिवारय् विपत्ति वःगु जुयाः एफ्राइमं उम्ह काय्या नां बरीआ धकाः तल।

24 वया शेराह धाःम्ह छम्ह म्हाय् दु। शेराहं क्वय् व च्वय् च्वंगु बेथ-होरोन अले उज्जेन-शेराह शहरयात पलिस्था यात।

25 रपाह एफ्राइमया काय् खः। रेशेप रपाहया काय् खः। तेलह रेशेपया काय् खः। तहन तेलहया काय् खः।

26 लादान तहनया काय् खः। अम्मीहद लादानया काय् खः। एलीशामा अम्मीहदया काय् खः।

27 नून एलीशामाया काय् खः। यहोशू नूनया काय् खः।☆

28 इमिगु देश व इपिं च्वनीगु थाय् बेथेल व उकिया जःखः च्वंगु शहर अले पुर्बय् नारान व पच्छिमय् गेजेर व उकिया जःखः च्वंगु शहर, हानं उत्तरय् शकेम व उकिया जःखः च्वंगु शहर, अय्याह व उकिया जःखः च्वंगु शहर तक खः।

29 मनश्शेया इलाकाया सिमानाय् बेथ-शान, तानाक, मगिदो व डदोर शहर उमिगु जःखः च्वंगु गां दु। थुपिं शहरय् इस्राएलया काय् योसेफया सन्तान च्वनीगु खः।

आशेरया सन्तान

30 आशेरया काय्पिं – यिम्ना, यिश्वा, यिश्वी व बरीआ खः। इमि केहें सेरह खः।

31 बरीआया काय्पिं – हेबेर व मल्कीएल खः। मल्कीएल बिर्जेतया बाः खः।

32 हेबेर, यप्लेत, शोमेर, होताम व इमि केहें शूअया बाः खः।

33 यप्लेतया काय्पिं – पासक, बिम्हाल व अश्वात खः। थुपिं यप्लेतया काय्पिं खः।

34 शोमेरया काय्पिं – अही, रोहगा, हब्बा व अराम खः।

35 वया किजा हेलेमया काय्पिं – सोपह, यिम्न, शेलेश व आमाल खः।

36 सोपहया काय्पिं – सूह, हर्नेपेर, शूआल, बरी, यिम्नाह,

37 बेसेर, होद, शामा, शिल्शा, यिन्नान व बीरा खः।

38 येतेरया काय्पिं – यपुन्ने, पिस्पा व अरा खः।

39 उल्लाया काय्पिं – आरा, हन्नीएल व रिसिया खः।

40 थुपि सकलें आशेरया सन्तान खः। इपि परिवार परिवारया नायः, ल्ययातःपि मनूत व बहादुर सिपाईत खः। अले तःधंपि नायःत खः। वंशावलीकथं इमिके २६,००० म्ह सिपाई दु।

8

बेन्यामीनया वंशावली

1 बेन्यामीनया न्हापां बूम्ह काय् बेला, माइलाम्ह काय् अश्बेल, साइलाम्ह काय् अहरह,

2 कार्हिलाम्ह काय् नोहा व चिधिकःम्ह काय् रफा खः।

3 बेलया काय्पि — अद्गर, गेरा, अबीह्द,

4 अबीशू, नामान, अहोह,

5 गेरा, शप्पान व हराम खः।

6 एह्दया काय्पि थुपि खः — (थुपि गेबायापि मनूतय् पुर्खातय् परिवारया नायःत खः, अले इमित ज्वनाः मानहतय् यंकूगु खः।)

7 नामान, अहियाह व गेरा खः। इमित जबरजस्ती मानहतय् यंकूबलय् गेरा इमि न्ह्यलुवाः जुयाः वंगु खः। व उज्जा व अहीह्दया बाः खः।

8 सहरेमं थः कलाःपि हुशीम व बारायात पार बिल। लिपा मोआब देशय् च्वनाच्चंबलय् वया न्हय्म्ह काय्पि दत।

9 वया न्हम्ह कलाः होडेशपाखें दुपि थुपि न्हय्म्ह काय्पिनिगु नां— योबाब, सिबिअ, मेशा, मल्काम,

10 यूस, साकिया व मिर्मा खः।

सहरेमया थुपि काय्पि — सकलें थथःगु परिवारया मू मनूत खः।

11 हुशीमपाखें सहरेमया निम्ह काय्पि — अहीतूब व एल्पाल दत।

12 एल्पालया काय्पि — एबेर, मिशाम व शेमेद खः। शेमेद ओनो व लोद शहर अले उकिया नापनापं च्वंगु गां पलिस्था याःगु खः।

13 बरीआ व शेमा नं एल्पालया काय्पि खः। इपि अय्यालोनय् च्वंपिनिगु परिवार परिवारया नायःत खः। इमिसं गातय् च्वंपि मनूतय् ख्यानाछ्वःगु खः।

14 बरीआया काय्पि — अहियो, शाशक, यरेमोत,

15 जबदियाह, आराद, एदेर,

16 मिखाएल, यिश्पा व योहा खः।

17 एल्पालया काय्पि — जबदियाह, मशुल्लाम, हिज्की, हेबेर,

- 18 यिशमैर, यिज्लीअ व योबाब खः।
 19 शिमीया काय्पि – याकीम, जिक्की, जब्दी,
 20 एलीएनै, सिल्लैतै, एलीएल,
 21 अदायाह, बरायाह व शिम्रात खः।
 22 शाशकया काय्पि – यिशपान, एबेर, एलीएल,
 23 अब्दोन, जिक्की, हानान,
 24 हनन्याह, एलाम, अन्तोतियाह,
 25 यिपदिया व पनूएल खः।
 26 यरोहामया काय्पि – शम्शैर, शहर्याह, अतल्याह,
 27 यारेस्याह, एलिया व जिक्की खः।
 28 थुपि सकलें थथःगु परिवारया म् मनूत खः। वंशावलीइ इमिगु नां च्वयातःगु
 दु। इपि सकलें यरूशलेमय् च्वंपि खः।
 29 यीएलं गिबोन शहर पलिस्था यात। अले अन च्वन। वया कलाःया नां माका
 खः।
 30 वया तःधिकःम्ह काय्पा नां अब्दोन खः।
 वया मेपि काय्पि – सूर, कीश, बाल, नेर, नादाब,
 31 गदोर, अहियो, जेकेर व मिक्त्तोत खः।
 32 मिक्त्तोत धाःसा शिमाहया बाः खः। इपि यरूशलेमय् थःथितिपिनि सत्तीक
 च्वनीगु खः।

जुजु शाऊलया वंशावली

- 33 नेर कीशया बाः खः। कीश शाऊलया बाः खः। अले शाऊल जोनाथन,
 मल्कीशूअ, अबीनादाब व एशबालया बाः खः।
 34 जोनाथनया काय् मरीब्बाल खः। मरीब्बाल मीकाया बाः खः।
 35 मीकाया काय्पि – पीतोन, मेलेक, तारे व आहाज खः।
 36 आहाज यहोअदाया बाः खः। यहोअदा आलेमेत, अज्मावेत व जिम्नीया बाः
 खः। जिम्नी मोसया बाः खः।
 37 मोस बिनेया बाः खः। रफाह बिनेया काय् खः। एलासा रफाहया काय् खः।
 अले आसेल एलासाया काय् खः।
 38 आसेलया खुम्ह काय्पिनिगु नां अज्जीकाम, बोकरू, इश्माएल, शार्याह,
 ओबदिया व हानान खः।

39 आसेलया किजा एशोक खः। एशोकया स्वम्ह काय्पि दु। एशोकया न्हापां बूम्ह काय् ऊलाम, माइलाम्ह काय् येऊश व चिधिकःम्ह काय् एलीपेलेत खः।

40 ऊलामया काय्पि — वीर सिपाई व धनुष वाण बांलाःक कय्के सःपि खः। इमि छय्-छुइपिं मुक्कं सछि व नेय्म्ह दु।

थुपि सकलें बेन्यामीन कुलयापि मनूत खः।

9

1 थुकथं सकल इस्राएलीतय्गु नां इस्राएलया जुजुपिनिगु इतिहासय् दुगु वंशावलीया धलखय् च्वल।

ज्वनायंकूपिं यरूशलेमय् लिहां वःगु

यह्दायापिं मनूतय्त थःगु विश्वासघातं यानाः बेबिलोनय् ज्वना यंकल।

2 ज्वना यंकूगु थासं लिहां वयाः थथःगु शहरय् दुगु थथःगु सम्पत्तिइ दकलय् न्हापां च्वपिं इस्राएलीत, पुजाहारीत, लेवीत व देगलय् सेवा याइपिं मनूत खः।

3 यरूशलेमय् च्वंवःपिं यह्दा, बेन्यामीनी, एफ्राइम व मनश्शेया कुलयापिं थुपि खः —

4 अम्मिहदया काय् उत्तै। अम्मिहद ओम्रीया काय् व इम्रीया छय्, बानीया छुइ खः। बानी फारेसया सन्तान खः।

5 यरूशलेमय् च्वपिं शीलानीत थुपि खः — न्हापां बूम्ह असायाह व वया काय्पिं।

6 यरूशलेमय् च्वंवःपिं जेरहाती थुपि खः — यीएल। फुक्क यानाः यह्दा कुलयापिं ६९० परिवार लिहां वल।

7 यरूशलेमय् च्वंवःपिं बेन्यामीनीत थुपि खः — सल्लु, व मशुल्लामया काय्, होदबियाया छय्, व हस्सेनुअया छुइ खः।

8 यरोहामया काय् यिब्नियाह अले मिक्रीया छय्, उज्जीया काय् एलाह। अले शपत्याहया काय्, रूएलया छय् व यिबनियाया छुइ मशुल्लाम।

9 बेन्यामीनया वंशावलीकथं यरूशलेमय् इमि ९५६ म्ह मनू दु। इपिं सकलें थथःगु परिवारया मू मनूत खः।

लिहांवःपिं पुजाहारीत

10 यरूशलेमय् च्वंवःपिं पुजाहारीत थुपि खः — यदायाह, यहोयारीब, याकीन,

11 अजर्याह हिल्कियाहया काय् खः, हिल्कियाह मशुल्लामया काय् खः, मशुल्लाम सादोकया काय् खः। सादोक मरायोतया काय् खः। मरायोत परमेश्वरया देगः स्वइम्ह अहीतूबया काय् खः।

12 यरोहामया काय् अदायाह, यरोहाम पशहरया काय् व मल्कियाहया छय् खः। अले अदीएलया काय् मासै, अदीएल यहजेराया काय् व मशुल्लामया छय् व मशिलेमीतया छुइ खः। मशिलेमीत इम्मेरया काय् खः।

13 अन १,७६० म्ह पुजाहारी दु। इपिं थःथः परिवारया नायः खः। इपिं परमेश्वरया देगल्य् ज्या यायेफुपि मनूत खः।

लिहांवःपिं लेवीत

14 लिहांवःपिं लेवीत थुपि खः — हश्शूबया काय् शमायाह, हश्शूब अज्रीकामया काय् खः, अज्रीकाम हश्शूबयाहया काय् खः। हश्शूबयाह मरारीया सन्तान खः।

15 अले बक्बक्कर, हारेश, गालाल, व मीकाया काय् मन्तन्याह, मीका जिक्कीया काय् खः। जिक्की आसापया काय् खः।

16 अले शमायाहया काय् ओबदिया, शमायाहया गालालया काय् व यदूतूनया छय् खः। अले आसाया काय् बेरेक्याह, आसा एल्कानाया छय् खः, एल्काना नतोपातीतय् शहरया इलाकाय् च्वनीगु खः।

17 यरूशलेमय् ध्वाखा पिवाःत लिहांवःपिं थुपि खः — शल्लूम, अक्क्ब, तल्मोन, अहीमन व इमि किजापि। इमि दाजु शल्लूम नायः खः।

18 थुबलय् तक व देगःया पुर्बपाखे च्वंगु जुजुया ध्वाखाय् पिवाः खः। इपिं लेवीतय् छाउनीया लुखा पिवाःत खः।

19 कोरेया काय् शल्लूम, कोरे कोरह वंशयाम्ह एब्यासापया सन्तान खः। कोरह वंशयापिनिगु ज्या नापलायेगु पालया मू ध्वाखाय् पिवाच्वनेगु खः। इमि पुर्खापिन्सं नं अथे हे परमप्रभु च्वनादीगु पवित्र पालया ध्वाखाय् पिवाच्वनेगु ज्या याःगु खः।

20 न्हापा छगू इलय् एलाजारया काय् पीनहास इमिगु ज्या स्वइम्ह हाकिम खः। परमप्रभु वनापं दी।

21 मेशेलेम्याहया काय् जकरिया नापलायेगु पालया ध्वाखा पिवाः खः।

22 २१२ म्ह मनुयात देगःया ध्वाखा पिवाःया ज्या यायेत ल्यःगु खः। इमिगु नां गांगांया नां वंशावलीया धलखय् च्वःगु दु। इमि पुर्खायात अज्याःगु विश्वास बहःगु ज्या यायेत दाऊद व अगमवक्ता शमूएलं ल्यःगु खः।

23 नापालायेगु पालया ध्वाखाय् पिवाः च्वनेगु ज्या इमिगु व इमि सन्तानयागु खः।

24 ध्वाखा पिवाःत पुर्ब, पश्चिम, उत्तर व दच्छिन प्यखेरं दु।

25 अले इमि थःथितित थथःगु गामं न्हय्न्हु लिपा पालंपाः इपिनापं च्वनेत वयेमाः।

26 प्यम्ह मू पिवाः च्वनिपि मनूत नं लेवीत जुइगु। परमेश्वरयागु देगःया क्वथा व सम्पत्ति इमिगु जिम्माय् खः।

27 चान्हय् इपि परमेश्वरया देगःया लिक्क च्वनीगु खः। छायाःसा देगःया रक्षा यायेगु व सुथ पतिक देगःया ध्वाखात चाय्केगु ज्या इमिगु खः।

28 छुं मेपि लेवीतय्गु जिम्माय् देगल्य् छ्यलिगु थलबल दु। इमिसं थलबल पित यंकीबलय् ल्याः खानाबीगु अले ल्याः खानाः लित काइगु।

29 मेपि ध्वाखा पिवाःतय्गु जिम्माय् मेगु सामान, छुचुं, दाखमघ, जैतूनया चिकं, गुँगु व मसला दु।

30 छुं पुजाहारीतय्सं मसला ल्वाक छ्यायेगु ज्या याइगु।

31 कोरह वंशयाम्ह शल्लूमया तःधिकःम्ह काय् लेवी मत्तित्याहया ज्या देछाया मरि छुइगु खः।

32 इमि कोरह वंशयापिं छुं दाजुकिजापिनिगु ज्या विश्रामबार पतिकं छायेहःगु मरि तयातःगु तेबिलय् मरि तयार यायेगु खः।

33 म्ये हालीपिं व बाजं थाइपिं लेवीत गुपिं लेवीतय् परिवारया नायःत खः। इमिगु लागि अलग यानातःगु क्वथाय् च्वनीगु। इमिसं छुं नं ज्या याये म्वाः, छायाःसा इमित चान्हय् नं न्हिनय् नं ज्या यायेत सःतिगु।

34 इपिं सकलें परिवार परिवारयापिं नायःत खः। इमिगु नां इमिगु वंशावलीया धलखय् च्वयातःगु दु। इपिं यरूशलेमय् च्वनीगु खः।

जुजु शाऊलया पुर्खा व सन्तान

35 गिबोन शहर पलिस्था याःम्ह यीएल गिबोनय् च्वनीगु खः। वया कलाःया नां माका खः।

36 वया तःधिकःम्ह काय् अब्दोन व मेपि काय्पिं – सूर, कीश, बाल, नेर, नादाब,

37 गदोर, अहियो, जकरिया व मिक्लोत खः।

38 मिक्लोत शिमामया बाः खः। इपिं नं यरूशलेमय् थःथितितय् लिक्क च्वनीगु।

39 नेर कीशया बाः खः, अले कीश शाऊलया बाः खः। शाऊल जोनाथन, मल्कीशूअ, अबीनादाब व एश्बालया बाः खः।

40 जोनाथन मरीब्बालया बाः व मरीब्बाल मीकाया बाः खः।

41 मीकाया पेम्ह काय्पि दु। इमिगु नां पीतोन, मेलेक, तहैरे व आहाज खः।

42 आहाज यादाहया बाः खः, अले यादाहया स्वम्ह काय्पि दु। इमिगु नां आलेमेत, अज्मावेत व जिप्पी खः। जिप्पी मोसया बाः खः।

43 मोस बेनेया बाः, बेने रपायाहया बाः, रपायाह एलासाया बाः व एलासा आसेलया बाः खः।

44 आसेलया खुम्ह काय्पि दु – इमिगु नां अज्जीकाम, बोकरू इश्माएल, शार्याह, ओबदिया व हानान खः।

थुपि सकले आसेलया काय्पि खः।

10

शाऊल व वया काय्पि सीगु

१ शमू ३१:१-१३

1 पलिशतीतयसं इस्राएल्यापि मन्तयत हमला यात। इस्राएल्यापि मन्त पलिशतीतपाखें बिस्सुं वन। पलिशतीतयसं गिल्बो डाँडाय् यक्व इस्राएलीतयत स्यात।

2 पलिशतीतयसं शाऊल व वया काय्पिन्त लिनुलिल। अले वया स्वम्ह काय्पि जोनाथन, अबीनादाब व मल्कीशूअयात स्यात।

3 शाऊलया प्यखेरं ग्यानपुक लडाईं जुल। वयागु म्हय् शत्रुया वाण लात अले व घाःपाः जुल।

4 शाऊलं थः हतियार क्वबिम्ह मनूयात धाल, “थुपि परमेश्वरयात मानय् मयाइपि पलिशतीतयसं वयाः जितः बांमलाःगु व्यवहार याये न्ह्यः छंगु तरवारं जितः स्या।”

तर वया हतियार क्वबिम्ह मनू अथे यायेत गयात। उकिं शाऊलं थःम्हं हे तरवार लिक्काः थःत स्यात।

5 शाऊल सीगु खनाः हतियार क्वबीम्हयसिनं नं थःम्हं थःत स्यात।

6 थुकथं शाऊल व वया स्वम्ह काय्पि सित। शाऊलया फुक्क घराना छक्कलं हे सित।

7 यिजेरेलया ब्यासिइ च्वपि इस्राएल्यापि फुक्क मन्तयसं थः सेना बिस्सुं वंगु अले शाऊल व वया काय्पि सीगु खनाः इपिं नं थथःगु शहर त्वःताः बिस्सुं वन। पलिशतीत इमिसं त्वःताः वंगु उपिं शहरय् च्वंवल।

8 कन्हय् खुन्ह पलिशतीत इस्राएल्यापि मन्तय सीपि मन्तयगु सामान काःवल। इमिसं शाऊलयागु व वया काय्पिनिगु सीम्ह गिल्बो डाँडाय् लुइकल।

9 इमिसं शाऊलयात नांगा यात। इमिसं वयागु छ्यं ध्यनाकाल। वयागु ल्वाभः नं काल। अनलि इमिसं थःगु देश न्यंकं थः घःत व मनूतयत् सुचं बीत दूतत छवल।

10 इमिसं शाऊलया ल्वाभः थः घःयागु देगलय् तल। वया छ्यं धाःसा दागोनया देगलय् नर्कि तानाः यख्खायाबिल।

11 पलिशतीतय्सं शाऊलयात छु छु याःगु व फुक्क खँ याबेश-गिलादयापि मनूतय्सं न्यन।

12 अले इमि वीर वीर मनूत शाऊल व वया कायपिनिगु सीम्ह काःवन। इमिसं इमिगु सीम्ह याबेशय् हयाः अन स्वसिमाया क्वय् थुनाबिल। अले इपि न्हयन्हु तक छु मनसैं दुखं च्वन।

13 परमप्रभु प्रति विश्वास बहःम्ह मज्जुलि शाऊल सित। छायाःसा वं यागु आज्ञा पालन मयाः। हानं वं सीम्ह मनूया आत्मालिसैं खँल्हाबल्हा याइम्ह मिसायाके सल्लाह काःगु खः।

14 वं परमप्रभुयाके सल्लाह मकाः। उकिं परमप्रभुं वयात स्यानाः देश यिशैया काय् दाऊदयात बियादिल।

11

दाऊदयात इस्राएलयाम्ह जुजु ल्यःगु

२ शमू ५:१-३

1 इस्राएलयापि सकल मनूत हेब्रोनय् दाऊदयाथाय् मुंवयाः वयात थथे धाल, “जिपि छिगु हे ला व हि खः।

2 न्हापा शाऊल जुजु जुयाच्चंबलय् नं छि लडाइँलय् जिमि सिपाइँतय् न्ह्यलवाः जुयादीगु खः। अले परमप्रभु छिकपिनि परमेश्वरं छितः थथे धयादिल, ‘छ जिम्ह मनूतय् जवाः व शासक जुइ।’ ”

3 इस्राएलयापि सकल थकालित हेब्रोनय् जुजु दाऊदयाथाय् वल। दाऊदं इपिलिसैं परमप्रभुया न्ह्याःने बाचा चिन। परमप्रभुं शमूएलया म्हुतुं धयादीगु थें हे इमिसं दाऊदयात इस्राएलया जुजु अभिषेक यात।

दाऊदं यरूशलेम त्याकूगु

२ शमू ५:६-१०

4 दाऊद जुजु व सकल इस्राएलीत वनाः यरूशलेम शहरय् हमला यात। उबलय् यरूशलेम शहरयात यबूस धाइगु खः। उबलय् अन यबूसीत च्वनाच्चंगु खः।

5 यबूसीतयसं दाऊदयात धाल, “छ थ्व शहरय् गुबलें दुहां वये फइ मखु!” तर दाऊदं इमिगु सियोनया किल्ला त्याका काल। उकिं मनूतयसं व शहरयात “दाऊदया शहर” धाल।

6 दाऊदं धाल, “यबूसीतयत् दकलय् न्हापा हमला याइम्ह मनू सेनापति जुइ।” सस्याहया काय् योआबं दकलय् न्हापा यबूसीतयत् हमला यात अले व सेनापति जुल।

7 दाऊद वना: किल्लाय् च्वंगु जुया: उकियात “दाऊदया शहर” धयाहल।

8 डाँडाया पुर्बपाखे चा जायका: माथं वंका: त:गु थासय् शुरू याना: वं शहर दय्कल। योआबं शहरयागु ल्यं दुगु ब्व दय्कल।

9 अले दाऊद झन झन बल्लानावन। छाया:सा दक्व शक्ति दुम्ह परमप्रभु वलिसे दी।

दाऊदया बहादुर सिपाईत

२ शमू २३:८-३९

10 सकल इस्राएलीतलिसें मिलय् जुया: परमप्रभुयागु बचंकथं दाऊदयात इस्राएल न्यंकयाम्ह जुजु दय्केत व वयागु राज्य बल्लाकेत ग्वाहालि ब्यूपि बहादुर सिपाईतय् नाय: थुपि हे ख: –

11 हकमोनी याशोबाम। याशोबाम नांजा:पिं स्वम्हयसिया नाय: ख:। छगू लडाईलय् वं याकचां हे स्वस:म्हयसित भालां स्या:गु ख:।

12 वया लिपा अहोही दोदैया काय् एलाजार। व स्वम्ह बहादुर सिपाईत मध्ये छम्ह ख:।

13 व पास-दम्मीमय् दाऊदलिसे दु। अन तछ्वया छगू बुँइ पलिशतीत लडाईं यायेत मुंगु ख:।

14 मनूत पलिशतीतय् न्ह्य:नं बिस्युं वन तर दाऊद अले व जक बुँया दथुइ दना: ल्वानाच्वन। अले उगु बुँयात बचय् याना: इमिसं पलिशतीतय् बुकल। थुकथं परमप्रभुं इस्राएलीतय् त्याकादिल।

15 स्विम्ह सिपाईत मध्ये तसकं नांजा:पिं स्वम्ह अदुल्लामया गुफाया लिक्क ला:गु ल्वहँतय् दाऊदयाथाय् क्वहां वन। पलिशतीत रपाईमया ब्यासिइ छाउनी दय्काच्वनाच्वंगु ख:।

16 उबलय् दाऊद किल्लाय् दु। अले उबलय् बेथलेहेम कब्जा याना: छपुच: पलिशती सिपाईत अन च्वनाच्वंगु ख:।

17 दाऊद तसकं प्याः चाःगुलि तःसलं धाल, “सुनां जितः बेथलेहेमया ध्वाखाया लिक्क च्वंगु तुंथिं लः त्वंकी?”

18 अले उपिं स्वम्ह बहादुर सिपाईत पलिशीतय् दथुं दुहां वनाः बेथलेहेमया ध्वाखाया लिक्क च्वंगु तुंथिं लः कयाः दाऊदयाथाय् हल। तर दाऊदं व लः त्वने मखु धाल। अले परमप्रभुया न्ह्यःने व लः प्वंकाः वं थथे धाल,

19 “छु जिं थुपिं मनूतयग्गु हि त्वनेगु ला? परमेश्वरं जितः थज्याःगु ज्या यायेत पनादीमा। थुमिसं थ्व लः थःगु ज्यान पानाः हःगु खः।” उकिं वं व लः त्वने मखु धाल।

थुपिं स्वम्ह बहादुर सिपाईतयसं अज्याःगु तःधंगु ज्या याःगु खः।

20 योआबया किजा अबीशै उपिं स्विम्हयसिया नायः खः। छकः वं भालां स्वसःम्हयसित स्यात अले थुकथं व उपिं स्वम्ह थें हे नांजाःम्ह मनू जुल।

21 उपिं स्वम्ह स्वयाः व यक्व नांजाःम्ह जुयाः इमि नायः जुल, तर व उपिं स्वम्ह मध्ये छम्ह मजू।

22 यहोयादाया काय् कब्सेलयाम्ह बनायाह बहादुर ज्या याःम्ह छम्ह बहादुर सिपाई खः। मोआबयापिं निम्ह दकलय् ल्वायेसःपिं सिपाईतयत स्याःम्ह व हे खः। छकः च्वापु गायाच्चवंबलय् वं छगू गालय् क्वहां वनाः छम्ह सिंहयात स्यानाबिल।

23 वं निगूत्या मिटर तःधीम्ह छम्ह मिश्रीयात नं स्यात। उम्ह मिश्रीया ल्हातय् तसकं ताहाकःगु व तःपुगु भाला दु। बनायाहं ल्हातय् छपु तःपुगु कथि कयाः वयात हमला यात। वं मिश्रीया ल्हातं भाला लाकाकाल। अले उकिं हे वयात स्यानाबिल।

24 यहोयादाया काय् बनायाहं अज्याःगु तःधंगु ज्या याःगु खः। व उपिं स्वम्ह बहादुर सिपाईत थें हे नांजाःम्ह सिपाई जुल।

25 उपिं स्विम्ह मनू स्वयाः वयात यक्व इज्जत दत। तर व स्वम्ह मध्ये छम्ह मजू। वयात दाऊदं थः अङ्गरक्षकतय् नायः ल्यल।

26 वया बहादुर सिपाईत थुपिं हे खः — योआबया किजा असाहेल, बेथलेहेमयाम्ह दौदैया काय् एल्हानान,

27 हारोदी शम्मोत, पेलोनी हेलेस,

28 तकोयाम्ह इक्केशया काय् ईरा, अनातोतयाम्ह अबीएजेर,

29 हशाती सिब्बकै, अहोही ईलै,

30 नतोपाती महरै, नतोपाती बानया काय् हेलेद,

31 बेन्यामीनपाखें गिबाया रीबैया काय् ईथै, पिरातोनी बनायाह,

32 गाशया खुसिचाया लिक्क च्वम्ह हरै, अर्बाती, अबीएल,

- 33 बहरीमी अज्मावेत, शाल्बोनी एल्याहबा,
 34 गीजोनी हाशेमया काय्पि, हरारी शागेया काय् जोनाथन,
 35 हरारी साकारया काय् अहीआम, ऊरया काय् एलीपाल,
 36 मकेराती हेपेर, पेलोनी अहियाह,
 37 कर्मेलया हेस्रो, एज्बैया काय् नौरै,
 38 नातानया किजा योएल, हग्रीया काय् मिभार,
 39 अम्मोनी सेलेक, बेरोती नहरै गुम्ह सस्याहया काय् योआबया ल्वाभः
 ज्वनीम्ह खः।
 40 यित्री ईरा, यित्री गारेब,
 41 हिती उरियाह, अहलैया काय् जाबाद,
 42 स्विम्ह मिजंतनापं रुबेनी शीजाया काय् अदीना। अदीना रुबेनीतय् छम्ह
 नायः खः।
 43 माकाया काय् हानान, मिन्नी योशापात,
 44 अस्तेराती उज्जीया, अरोएरयाम्ह होतामया काय्पि शमा व यीएल,
 45 शिम्मीया काय् येदीएल, वया किजा तिजी योहा,
 46 महाबी एलीएल, एल्लामया काय्पि यरीबे व योशब्ब्याह, मोआबी यित्मा,
 47 एलीएल, ओबेद व मेजोबी यासीएल।

12

दाऊदनापं मिलय् जूवःपि बहादुर सिपाइँत

1 कीशया काय् शाऊलपाखें दाऊद बिस्युं जूबलय् सिक्लग शहरय् वनापं मिलय्
 जूवःपि बहादुर सिपाइँत थुपि खः — इपि दाऊदयात लडाइँलय् ग्वाहालि ब्यूपि बहादुर
 सिपाइँत मध्येयापि खः।

2 इमिसं जव व खव ल्हातं धनुष वाण कय्के फु। अथे हे थुमिसं जव व खव
 ल्हाः छ्यलाः कप्तांचां ल्वहँ कय्के फु। इपि बेन्यामीन कुलयापि शाऊलया थःथिति
 खः।

3 इमि नायः गिबियाती शेमाहया काय्पि अहीएजेर व वया ल्यूयाम्ह योआश
 खः। अले अज्मावेतया काय्पि यजीएल व पलेत, बराकाह व अनातोती येह,

4 गिबोनी यिशमायाह, (यिशमायाह स्विम्ह बहादुर मध्ये छम्ह बहादुर व
 स्विम्हय्सिया नायः खः)

5 यर्मिया, यहासेल, योहानान, व गदेराती योजाबाद, एल्जै, यरीमोट, बाल्याह, शमरयाह, हारूपी शपत्याह,

6 एल्काना, यिश्याह, अज़ेल, कोरह वंशयाम्ह योएजर व याशोबाम,

7 गदोरया यरोहामया कायपि योएलह व जबदियाह खः।

8 गाद कुलयापि छुं मनूत नं मरूमिइ दुगु किल्लाय् दाऊदनापं मिलय् जूवल।
इपि लडाईया लागि तालिम कयातःपि सिपाईत खः। इमिसं भाला व ढाल बांलाक चले याये सः। इमिगु ख्वाः सिंहयागु ख्वाः थें च्वं, अले पहाड पहाडय् चल्ला थें ब्वाय् वने फु।

9 एसेर इमि नायः खः, निम्हम्ह ओबदिया, स्वम्हम्ह एलिआब,

10 प्यम्हम्ह मिशमन्ना, न्याम्हम्ह यर्मिया,

11 खुम्हम्ह अतै, न्हय्म्हम्ह एजीएल,

12 च्याम्हम्ह योहानान, गुम्हम्ह एल्जाबाद,

13 झिम्हम्ह यर्मिया व झिंछम्हम्ह मकबन्ने खः।

14 थुपि गादीत सेनाया कप्तानत खः। इपि मध्ये दकले चिधंम्ह सिपाई सछिम्ह सिपाईति ग्यं। इपि मध्ये दकले तःधंम्ह सिपाई दूःछिम्ह सिपाईति ग्यं।

15 न्हापांगु दैया न्हापांगु लाय् यर्दन खुसिइ सिथ सिथ तक हे लः जाया वःबलय् इमिसं खुसि छिल। अले खुसिया पुर्ब व पच्छिमया ब्यासि-ब्यासिइ च्वंपि मनूतय्त लिनाछवत।

16 छकः बेन्यामीन व यहदा कुलयापि छपुचः मनूत दाऊद दुगु किल्लाय् वल।

17 इमित नापलायेत दाऊद पिहां वल अले थथे धाल, “छिपि जितः ग्वाहालि बीत पासा जुयाः वयागु खःसा थन छिमित लसकुस दु। तर जिं छिमिगु छुं स्यंकागु मदुसां छिमिसं ध्वंलानाः जितः जिम्ह शत्रुतयगु ल्हातय् बीत वयागु खःसा जिमि पुर्खातय् परमेश्वरं थ्व स्वयाः न्याय यानादीमा।”

18 उबलय् हे स्विम्ह मध्येया नायः अमासैयात परमेश्वरया आत्मां हपाःबियादिल। अले वं थथे धाल,

“हे यिशैया काय् दाऊद
जिपि छिपाखे दु।

छि ताःलायेमा

छितः ग्वाहालि ब्यूपि नं ताःलायेमा,
छाय्धाःसा छिमि परमेश्वरं हे छन्त ग्वाहालि यानादी।”

उकिं दाऊदं इमित लसकुस यात। वं इमित सेनाया नायःत दय्कल।

19 दाऊद पलिशतीतनापं मिलय् जुयाः शाऊलनापं लडाईं याः वनाच्चंबलय् मनश्शे कुलयापि छुं सिपाईत दाऊदयाथाय् बिस्युं वल। वं पलिशतीतयूत ग्वाहालि धाःसा मयाः, छायाधाःसा पलिशतीतय् शासकतयसं थज्याःगु सल्लाह यानाः वयात लितछवल, “थ्वं थः मालिकनापं मिलय् जुयाः झीत त्वःताबिल धाःसा झीगु छ्यं ल्यं दइ मखु।”

20 दाऊद सिक्लगय् लिहां वनाच्चंबलय् वयाथाय् बिस्युं वःपिं मनश्शे कुलयापि सिपाईत थुपि खः — अदनाह, योजाबाद, येदीएल, मिखाएल, योजाबाद, एलीह व सिल्लतै। थुपि मनश्शेया द्रुःछिम्ह द्रुःछिम्ह सेनाया नायः खः।

21 इमिसं हे हमला याःवइपिं शत्रुतलिसे ल्वायेत दाऊदयात ग्वाहालि बिल। छायाधाःसा इपिं सकलें बहादुर सिपाईत खः, अले सेनाया नायःत जुल।

22 दाऊदयात ग्वाहालि बीत न्हि न्हि यक्व मनूत वया हे च्वन। थुकथं दाऊदयाके परमेश्वरया सेना थें च्वंगु छगू तःधंगु व बल्लाःगु सेना दत।

हेब्रोणय् मेपिं दाऊदलिसे मिलय् जू वःगु

23 परमप्रभुं धयादीगु थें शाऊलया राज्य दाऊदया ल्हातय् बीत हेब्रोणय् ल्वाभः घानाः दाऊदलिसे मिलय् जूवःपिं मनूतयगु ल्याः थथे दु —

24 यहूदा कुलं — ढाल व भाला ज्वनातःपिं खुद्रुः व च्यासः (६,८००) म्ह सिपाईत लडाईंया लागि वल।

25 शिमियोन कुलं — न्हयेद्रुः व सच्छि (७,१००) म्ह लडाईं यायेफुपिं सिपाईत लडाईंया लागि वल।

26 लेवी कुलं — प्यद्रुः व खुसः (४,६००) म्ह।

27 हारूनया घरानाया नायः यहोयादानापं स्वद्रुः व न्हयसः (३,७००) म्ह मिजंत वल,

28 अले छम्ह बहादुर सिपाईं सादोकनापं वयागु हे परिवारयापिं निइनिम्ह नायःत वल।

29 बेन्यामीन कुलं — स्वद्रुः (३,०००) म्ह वल। इपिं शाऊलया थःथितित खः। उबलय् तक बेन्यामीन कुलयापि आपालं मनूत शाऊलया घराना प्रति वफादार जुयाच्चंगु खः।

30 एफ्राइम कुलं — तसकं बहादुर व थथःगु वंशय् नांजाःपिं निइद्रुः व च्यासः (२०,८००) म्ह सिपाईं वल।

31 दाऊदयात जुजु दय्केत मनश्शेया बच्छि कुलं — झिंच्याद्रुः (१८,०००) म्ह मनु वल।

32 इस्राएल कुलं — इस्राएलं छु यायेमा: धका: स्यूपिं अले ईयात थूपिं निइस: (२००) म्ह नाय:त व इमिसं धा:थें च्वनिपिं इमि थ:थितित वल।

33 हानं जबूलून कुलं — लडाईया लागि तयार जूपिं, फुक्क कथंया ल्वाभ: ज्वनात:पिं दाऊद प्रति वफादार नेयद्र: (५०,०००) म्ह सिपाई वल।

34 नप्ताली कुलं — द्र:छि (१,०००) म्ह हाकिमत अले ढाल व भाला ज्वनिपिं स्विन्हयद्र:म्ह सिपाई वल।

35 दान कुलं — लडाईया लागि तयार जूपिं निइच्याद्र: व खुस: (२८,६००) म्ह सिपाई वल।

36 अले आशेर कुलं — लडाईया लागि तयार जूपिं पिइद्र: (४०,०००) म्ह सिपाई वल।

37 रूबेन, गाद व यर्दनया पुर्बपाखेया मनश्शेया बच्छि कुलं — फुक्क कथंयागु ल्वाभ: ज्वनात:पिं छगू लाख व निइद्र: (१,२०,०००) म्ह सिपाई वल।

38 थुपिं सकले सिपाईत लडाईया लागि तयार जुया: दाऊदयात इस्राएल न्यंकयाम्ह जुजु दये हे दयेके धका: हेब्रोन शहरय् व:गु ख:। इस्राएलयापिं मेपिं मनूत नं व हे तातुनां छप्पं जूगु ख:।

39 इपिं दाऊदनापं हेब्रोनय् स्वन्हु तक च्वन। इमि थ:थितितय्सं इमिगु लागि नयेगु व त्वनेगु तयार या:गु ख:।

40 इस्राएल, जबूलून व नप्ताली कुलयापिं मनूतय्सं नं गधा, ऊँट, खच्चर, व द्रहंयात क्वबिका: छुचुं, य:मरि ग्वारा, किसमिस ज्वौय्, दाखमघ, जैतूनया चिकं हल। इमिसं स्याना: नयेत सा द्रहं व फैत नं ज्वनावल। इस्राएलयापिं मनूत तसकं लय्ता:।

13

बाचाया सनू किर्यत-यारीमं लित ह:गु

२ शमू ६:१-११

1 दाऊद जुजुं थ: फुक्क हाकिमत, थ: सेनाया जनरल व कप्तानतनापं सल्लाह यात। द्र:छिम्ह सिपाईतय् पुच:यापिं नाय:तनापं सल्लाह यात।

2 अनंलि वं इस्राएलयापिं सकल मनूतयत् थये धाल, “छिमिसं ज्यू धा:सा व परमप्रभु झी परमेश्वरयागु नं अज्या:गु हे इच्छा दुसा झीसं इस्राएलया फुक्क थासय् झीपिं मेपिं दाजुकिजापिं व इमिगु शहर अले पशु ज्वयेगु ख्यलय् च्वनिपिं पुजाहारीतयत् व लेवीतयत् झीपिंनापं मिलय् जू वा धका: खबर छवयेनु।

3 थः परमेश्वरया बाचा चिनादीगु सनू थःथाय् हयेनु, छायाधाःसा झीसं शाऊल जुजुया पालय् उकियात वास्ता मयाना।”

4 थ्व खँ सकल मनूतय्त यःगुलि इमिसं अथे यायेत मानय् जुल।

5 उकिं किर्यत-यारीमं परमेश्वरया सनू हयेत दच्छिनय् च्वंगु मिश्र देशया शिहोर खुसिनिसें उत्तरय् लेबो-हमात तकयापि सकल इस्राएलीतय्त दाऊदं मुंकल।

6 अले दाऊद व सकल इस्राएलीत यहूदाया बालाय् (बाला किर्यत-यारीमया मेगु नां खः) बाचा चिनादीगु सनू कायेत वन। व सनूयात परमेश्वर परमप्रभुया नामं सःतीगु खः। अले वयकः उकिया च्वय् कस्बतय् दथुइ च्वनादी।

7 मनूतय्सं अबीनादाबया छैय् वनाः परमेश्वरया बाचाया सनू पितहल। इमिसं उकियात छगः न्हगु गाडाय् तल। उज्जाह व अहियोनं उगु गाडा न्ह्याकल।

8 दाऊद व सकल इस्राएलीत परमेश्वरयात हनाबना तयेत थःगु फुक्क बलं प्याखं हुल। इमिसं म्ये हाल, सारणी, वीणा, दम्फु व भुस्याः थात, अले तुरही पुल।

9 इपिं कीदोनया अन्न दाइगु खलय् थ्यंकः वःबलय् द्रुहंत लुफि हाःगुलि उज्जाहं बाचाया सनू ज्वनेत थःगु ल्हाः न्ह्यज्याकल।

10 परमप्रभु उज्जाह खनाः तंचायादिल। अले सनू थ्यगुलि वयात स्यानादिल। व परमेश्वरया न्ह्यःने अन हे सित।

11 परमप्रभुं तम्बयाः उज्जाहयात सजॉय बियादीगुलि दाऊद तम्बल। अले वं उगु थाय्या नां फारेस-उज्जाह तल। व नां थौं तक नं दनि।

12 उखुन्हु दाऊद परमेश्वर खनाः ग्यात। अले वं धाल, “जिं परमेश्वरया सनू गथे यानाः थःनापं यंकै फे?”

13 उकिं दाऊदं सनू यरूशलेमय् मयंकू तर छखे वनाः गिती ओबेद-एदोमया छैय् यंकल।

14 परमेश्वरया सनू ओबेद-एदोमयाथाय् स्वला तक लानाच्वन। परमप्रभुं ओबेद-एदोमया परिवारयात व वयाके दुगु फुक्क चिजयात आशिष बियादिल।

14

दाऊदया मेपि सन्तान

1 टुरोसयाम्ह जुजु हीरामं दाऊदयाथाय् दूतत छवल। वं दाऊदया लायकू दनेत खयःसिं, दँकःमित व सिँकःमित नं छवल।

2 अले परमप्रभुं थःत धात्थें हे इस्राएलयाम्ह जुजु दय्कादीगु दु धइगु खँ दाऊदं सिल। छायाःसा परमेश्वरया प्रजा इस्राएलया निति वयागु राज्य यक्व तःधंगु जुइ धुंकूगु खः।

3 यरूशलेमय् दाऊदं मेपि मिस्तलिसें नं ब्याहा यात। वया येक्व काय्पि दत।

4 अन बूपि वया काय्पिनिगु नां थथे दु – शम्मूअ, शोबाब, नातान, सोलोमन,

5 यिभार, एलीशूअ, एल्पेलेत,

6 नोगह, नेपेग, यापी,

7 एलीशामा, बेलीयादा व एलीपेलेत।

दाऊदं पलिशतीतयत् बुकूगु

8 दाऊद इस्राएल न्यंकयाम्ह जुजु जूगु खँ न्यनाः पलिशतीतयस् वयात ज्वनेत थः सकल सेना छवल। दाऊद नं थ्व खँ न्यनाः इपिलिसें ल्वायेत वन।

9 पलिशतीतयस् रपाईमया ब्यासिइ च्वंपि मनूतयत् हमला यानाः इमिगु सामान लुतय यात।

10 अथे जुयाः दाऊदं परमेश्वरयाके न्यन, “जिं पलिशतीतयत् हमला याये ला? छिं इमित जिगु ल्हातय् बियादी ला?”

परमप्रभुं लिसः बियादिल, “हँ, जिं इमित छंगु ल्हातय् बी।”

11 दाऊद व वया सेना बाल-पराजीमय्* वन। अन इमिसं पलिशतीतयत् बुकल। अले वं धाल, “लः पंम्हुया पिहां वःगु थें जिमि शत्रुतय् विरोधय् परमेश्वरं जिपाखें पंम्हुया पिहां झाःगु दु।” अथे जुयाः व थायया नां बाल-पराजीम तल।

12 पलिशतीत बिस्युं वंवलय् इमिसं अन थः घःतय्गु मूर्तित त्वःताथकल अले दाऊदं उपि मूर्तितयत् छवय्काछवयेगु आज्ञा बिल।

13 हाकनं छकः पलिशतीत वयाः उगु ब्यासिइ लुटपीट यात।

14 उकिं दाऊदं हाकनं परमेश्वरयाके सल्लाह काल, अले परमेश्वरं वयात लिसः बियादिल, “च्वय् तप्यंक थाहां वने मते, चाःहिला हँ। अले मेखेपाखें थाकुराः सिमाया न्ह्यःनेनं हमला या।

15 छं थाकुराः सिमाया च्वका च्वकां सिपाइँत न्यासि वंगु थें च्वंगु सः न्यनीबलय् हमला या, छायाःसा जि परमेश्वर छंगु न्ह्यः न्ह्यः पलिशती सेनायात बुकेत वने।”

16 दाऊदं परमेश्वरया आज्ञा कथं यात। अले वं पलिशतीतयत् बुकल। वं अज्ज पलिशतीतयत् गिबोननिसें गेजेर तक लँ दुच्छि हे लिनायंकल।

* 14:11 १४:११ बाल-पराजीम या अर्थ “पंम्हुयाः झाःमह परमप्रभु खः।”

17 थथे दाऊदया नां फुक्क थासय् थ्यन। अले परमप्रभुं फुक्क जातियात वयागु भय काइपिं दय्कादिल।

15

सन् यरूशलेमय् हःगु

1 दाऊदं दाऊदया शहरय् थःगु लागि लायकू दय्कल। वं परमेश्वरया बाचाया सन् तयेत छगूथाय् नं दय्कल। अले उकिया लागि छगू पाल ग्वल।

2 अले लेवीतय्सं जक परमेश्वरया सन् क्वबीमा धकाः वं आज्ञा बिल। छायाःसा परमप्रभुं इमित हे सन् क्वबीत व न्ह्याबलेया सेवा यायेत ल्यःगु खः।

3 थुकथं दाऊदं इस्राएलीयापिं सकल मनूतय्त बाचाया सन् उकिया लागि वं दय्कूगु थासय् हयेत यरूशलेमय् सःतल।

4 अनलि वं हारूनया सन्तान व लेवीतय्त सःतके छवल।

5 कहातया सन्तानपाखें नायः उरीएल व वया १२० म्ह थःथिति वल।

6 मरारीया सन्तानपाखें नायः असायाह व वया २२० म्ह थःथिति वल।

7 गेशोर्नया सन्तानपाखें नायः योएल व वया १३० म्ह थःथिति वल।

8 एलीजापानया सन्तानपाखें नायः शमायाह व वया २०० म्ह थःथिति वल।

9 हेब्रोनीया सन्तानपाखें नायः एलीएल व वया ८० म्ह थःथिति वल।

10 उज्जीएलया सन्तानपाखें नायः अम्मिनादाब व वया ११२ म्ह थःथिति वल।

11 दाऊदं सादोक व अबियाथार पुजाहारीत व खुम्ह लेवीत उरीएल, असायाह, योएल, शमायाह, एलीएल व अम्मिनादाबयात सःतल।

12 अले इमित थथे धाल, “छिपिं हे लेवीतय् परिवार परिवारयापिं नायःत खः। छिमिसं थःपिन्त व छिमि थःथितितय्त पवित्र या। अले परमप्रभु इस्राएलया परमेश्वरया बाचाया सन् जिं व तयेत दय्कागु थासय् हजि।

13 थ्व सिबें न्हापा अन छिपिं मदुगुलि परमप्रभु परमेश्वर जिपिं खनाः तंचायादिल। छायाःसा जिमिसं बाचाया सन् गथे यानाः हयेमाः धकाः वय्कःयाके मन्यन।”

14 उकिं परमप्रभु इस्राएलया परमेश्वरयागु सन् हयेत पुजाहारीत व लेवीतय्सं थःपिन्त पवित्र यात।

15 मोशां परमेश्वरया वचनकथं आज्ञा ब्यू थें लेवीतय्सं परमेश्वरया सन् न्वःनापं थथःगु ब्वहलय् क्वबिया हल।

16 अनंलि दाऊदं लेवीतय् नायःतयत् इमि थःथितिपिन्त लसताया म्ये हालेत व सारंगी, वीणा व भुस्यालं संगीत थायेत म्ये हालीपिं व बाजं थाइपिकथं ल्यः धकाः आज्ञा बिल।

17 अले लेवीतयस्सं योएलया काय् हेमान व वया दाजुकिजापिपाखें बेरेक्याहया काय् आसाप व इमि दाजुकिजापिपाखें मरारीतपाखें कूशायाहया काय् एतानयात ल्यल।

18 इपिनापं इमिसं निगु थसय् च्वंपि थःथितित जकरिया, याजीएल, शमीरामोत, यहीएल, उन्नी, एलीआब, बनायाह, मासेयाह, मत्तित्याह, एलीपलेह, मिक्नेयाह व लुखा पिवाःत ओबेद-एदोम व यीएलयात ल्यल।

19 म्ये हालामि हेमान, आसाप व एतानयात कँययागु भुस्याः थायेत ल्यल।

20 सारंगीइ अलामोत धाःगु राग थायेत जकरिया, अजीएल, शमीरामोत, यहीएल, उन्नी, एलीआब, मासेयाह व बनायाहयात ल्यल।

21 अले वीणाय् शिमिनिथ धाःगु राग थायेत मत्तित्याह, एलीपलेह, मिक्नेयाह, ओबेद-एदोम, यीएल व अजज्याहयात ल्यल।

22 संगीत ज्ञान दुम्ह जुयाः इमिसं कनन्याहयात म्ये हालीपिं लेवीतयत् जिम्मा बिल।

23 बाचाया सनूया पिवाः च्वनीपिं बेरेक्याह व एल्काना खः।

24 परमेश्वरया सनूया न्ह्यःने तुरही पुइपिं पुजाहारीत शबन्याह, योशापात, नतनेल, अमासै, जकरिया, बनायाह व एलीएजर खः। ओबेद-एदोम व येहियाह उकिया लुखा पिवाःत खः।

25 अले दाऊद व इस्राएलयापिं थकालित व द्रुःछि-द्रुःछिम्ह सिपाइँतय् नायःत ओबेद-एदोमया छँनं लयल्यतातां बाचाया सनू हयेत वन।

26 परमप्रभुया बाचाया सनू क्वबिपिं लेवीतयत् परमेश्वरं ग्वाहालि बियादीगुलि इमिसं न्ह्यम्ह द्रुहं व न्ह्यम्ह भ्याःचायात बां बिल।

27 दाऊद व सनू क्वबिपिं सकल लेवीत म्ये हालीपिं व म्ये हालिपिनि नायः कनन्याहं मलमलयागु वसः फिनातःगु दु। दाऊदं मलमलया एपोद नं फिनातःगु दु।

28 थथे सकल इस्राएलीतयस्सं जयजय धकाः हा हां फैया नेकू व तुरही पुपुं अले भुस्याः, सारंगी व वीणा थाथां परमप्रभुया बाचाया सनू ज्वनाः वल।

29 परमप्रभुया बाचाया सनू दाऊदया शहर दुने यंकाच्चंबलय् शाऊलया म्हाय् मीकलं इयालं स्वल, वं दाऊद जुजुयात प्याखं हुलाच्चंगु व लयल्यतातां तिन्हुंयाच्चंगु खनाः वं दाऊदयात घच्चाये कथं स्वल।

16

1 लेवीतयसं परमेश्वरया सनू हयाः दाऊदं व तयेत ग्वःगु पाल दुने तल, अले इमिसं परमेश्वरयात होमबलि व मेलबलि छाल।

2 दाऊदं होमबलि व मेलबलि छायेधुंकाः वं परमप्रभुया नामय् मनूतयत् सुवाः बिल।

3 अले वं सकलें इस्राएली मिजंत व मिस्तयत् छपा छपा मरि, छगः छगः खजूर व छज्वाँय् छज्वाँय् किसमिस इनाबिल।

4 परमप्रभुया सनूया न्ह्यःने सेवा यायेत, वय्कःयात इनाप यायेत, सुभाय् देछायेत अले परमप्रभु, इस्राएलयाम्ह परमेश्वरया प्रशंसा यायेत दाऊदं छुं लेवीत ल्यल।

5 इमि नायः आसाप खः। अले वया ल्यूयाम्ह जकरिया खः। यीएल, शमीरामोत, यहीएल, मत्तित्याह, एलीआब, बनायाह, ओबेद-एदोमयात वीणा व सारंगी थायेत ल्यल। आसाप धाःसा भुस्याः थाइगु।

6 अले परमेश्वरया बाचाया सनूया न्ह्यःने न्ह्याबलें तुरही पुयेत, पुजाहारीत बनायाह व यहासेलयात ल्यल।

दाऊदया सुभाय्या भजन

भज १०५:१-१५; ९६:१-१३; १०६:१, ४७, ४८

7 उखन्हु आसाप व वया थःथितितयत् दाऊदं थ्व भजन परमप्रभुयात सुभाय् देछायेत बिल –

8 परमप्रभुयात सुभाय् देछा, वय्कःया नां का

जाति जातिया दथुइ वय्कलं छु यानादीगु खः व न्यंकि।

9 वय्कःया नितिं भजन हा, वय्कःया प्रशंसाया म्ये हा,

वय्कःया फुक्क अजू चायापुगु ज्याया बारे कै,

10 वय्कःया पवित्र नांयात तःधंकि, परमप्रभुयात मालिपिनिगु नुगः लयतायेमा।

11 परमप्रभु व वय्कःया शक्तियात माला स्व, वय्कःयात माला तुं च्वै।

12 वय्कलं यानादीगु गजबगु ज्या लुमंकि, वय्कःया अजू चायापुगु ज्या व वय्कःया नियम लुमंकि,

13 अय, वय्कःया दास इस्राएलया सन्तान, अय, वय्कलं ल्ययादीपिं याकूबया कायपिं।

14 वय्कः परमप्रभु झी परमेश्वर खः। वय्कःया न्यायया ज्या पृथ्वी न्यंक जुइ।

15 वय्कलं थःगु बाचा न्ह्याबलें लुमंकादी, वय्कलं थःगु बाचा द्रुलद्रुः पुस्तायात बियादीगु खः।

16 व बाचा वय्कलं अब्राहामलिसे चिनादिल, अले उकिया बारे वय्कलं इसहाकलिसे पाफयादिल।

17 गुगु वय्कलं याकूबलिसें पक्का यानादिल, अले इस्राएलनापं थथे धका:

न्ह्याबलेया बाचाकथं चिनादिल,

18 “जिं छन्त हे कनान देश बी। व छंगु थःगु सर्बय जुइ।”

19 अबलय् छं ल्याखय् कम, यक्व हे कम,

अले कनान देशय् परदेशी जुयाच्चंगु खः।

20 इपिं छगू देशं मेगु देश छगू राज्यं मेगु राज्य चाचाःहिलाः जुइ।

21 अयनं सुं मनूयात इमित दुःख बीके मब्ब्य, इमित रक्षा यायेत वय्कलं जुजुपिन्त थथे धकाः ख्याच्चः बियादिल,

22 “जिं ल्ययापिं मनूतय् त थी मते, जिमि अगमवत्तातय् त स्यंके मते।”

23 हे पृथ्वीयापिं सकलें मनूत, परमप्रभुया न्ह्यःने म्ये हा, न्हियान्हिथं वय्कलं यानादीगु उद्धारया भिंगु खँ न्यंकाच्चँ।

24 जाति जातियात वय्कःया महिमाया बारे न्यकि, सकल मनूतय् वय्कःया अजू चायापुगु ज्याया बारे कँ।

25 परमप्रभु तःधंम्ह व तसकं प्रशंसा याये बहःम्ह खः।

मेपिं घःतय् त स्वयाः वय्कःयात अप्वः मानय् यायेमाः।

26 जाति जाति याःपिं घःत ला मूर्ति जक खः, तर परमप्रभुं ला स्वर्ग दय्कादिल।

27 महिमा व गौरव वय्कःया न्ह्यःने दु, वय्कःयाथाय् बल व लसता दु।

28 हे जाति जातिया छँजःपिं, परमप्रभुयात तःधंकि, वय्कःया महिमा व बलयागु प्रशंसा या।

29 परमप्रभुया नांयात तःधंकेत वय्कःया प्रशंसा या, देछा ज्वनाः वय्कःया देगलय् वा।

पवित्रतां झःझः धाय्कः परमप्रभुया आराधना या।

30 हे पृथ्वीयापिं सकल मनूत, वय्कःया ग्याःभय का!

संसार धिसिलाक्क च्वंगु दु, उकियात संके फइ मखु।

31 पृथ्वी व आकाश लय्तायेमा! परमप्रभुं हे शासन यानादी धकाः जाति-जातियात धायेमा।

32 समुद्र व अन दुपिं फुक्क प्राणीत लय्तायाः थ्वय्क हालेमा। ख्यः व उकी दुगु फुक्क चिज लय्तायेमा।

33 अले गुँया सिमातयसं म्ये हाली, इमिसं परमप्रभुया न्ह्यःने लयूलयूतातां म्ये हाली, छायाःसा वय्कः पृथ्वीया न्याय यायेत झाइ।

34 परमप्रभुयात सुभाय् ब्यु, छायाःसा वय्कः भिंम्ह खः, वय्कःया दयामाया न्ह्याबलें दयाच्चनी।

35 अले थथे धकाः तःसलं हा, “हे जिमित उद्धार यानादीम्ह परमेश्वर, जिमित बचय् यानादिसँ। जिमित मुंकाः मेगु जातितपाखें बचय् यानादिसँ। अले जिमिसं छिगु नामय् सुभाय् बी फइ, अले छिगु पवित्र नांयागु प्रशंसा याये।”

36 परमप्रभु इस्राएलयाम्ह परमेश्वरया न्ह्याबलें प्रशंसा जुइमा।

अले सकल मनूतयसं धाल, “आमेन! परमप्रभुया प्रशंसा जुइमा।”

37 अले दाऊद जुजुं आसाप व वया लेवी दाजुकिजापिन्त न्हियान्हिथं यायेमाःगु नियमकथं बाचाया सनूया न्ह्यःने न्ह्याबलें सेवा यायेत तल।

38 वं ओबेद-एदोम व वया खुइच्याम्ह (६८) ग्वाहालिमितयूत इपिनापं सेवा यायेत तल। लुखाय् पिवाः च्वनेत यदूतनया काय् ओबेद-एदोम व होसायात तल।

39 हानं दाऊदं पुजाहारी सादोक व वया पुजाहारी दाजुकिजापिन्त गिबोनया तःजाःगु थासय् परमप्रभुया पालया न्ह्यःने तल।

40 इमिसं परमप्रभुं इस्राएलीतयूत बियादीगु व्यवस्थाय् च्वया तःकथं सुथय् व बहनी परमप्रभुया निंति होमबलि वेदीइ छाइगु।

41 परमप्रभुया न्ह्याबलें दयाच्चनीगु दयामाया या कारणं वय्कःयात सुभाय् बीत दाऊदं हेमान, यदूतन व नां कयाः ल्यःपिं मनूतयूत तल।

42 पवित्र भजनया निंति तुरही पुइगु, भुस्याःत व मेमेगु बाजं थायेगु जिम्मा हेमान व यदूतनयात ब्यूगु खः। यदूतनया कायपिन्त लुखाय् पिवाः च्वनेत तल।

43 अनंलि सकलें मनूत थथःगु छैय् लिहां वन, दाऊद अले थः परिवारयात आशिष बीत वन।

17

दाऊदयात परमेश्वरया बचं

२ शमू ७:१-१७

1 थःगु लायकुलिइ च्वनेधुंकाः छन्हू दाऊदं नातान अगमवत्कायात धाल, “थन जि देवदारु सिं दय्कूगु लायकुलिइ च्वनाच्चनागु दु, तर परमप्रभुया बाचाया सनू धाःसा पालय् दु।”

2 नातानं दाऊदयात धाल, “छिगु मनय् छु दु व यानादिसँ। परमेश्वर छिलिसे दी।”

3 उखुन्हु चान्हय् परमेश्वरया वचन नातानयाथाय् वल,

4 “आ: वना: जिम्ह दास दाऊदयात थथे धा। ‘परमप्रभुं थथे धयादी, जि च्वनेत जिगु लागि देग: दय्कीम्ह छ मखु।

5 जिं इस्राएलीतय् मिश्र देशं पित हयागु दिनिसें थौं तक जि गुबलें देगलय् च्वनागु मद्दु। जि न्ह्याबलें पालय् च्वनागु दु अले छथासं मेगु थासय् वयेगु वनेगु यानाच्वना।

6 गन गन जि इस्राएलनापं वयेगु वनेगु याना: छु जिं जिगु लागि देवदारु सिँया देग: छाय् मदय्कागु धका: इमि नाय:तय् न्यना ला?”

7 “उकिं आ: वना: जिम्ह दास दाऊदयात थथे धा, ‘दक्व शक्ति दुम्ह परमप्रभुं थथे धयादी, जिं छन्त ख्यलय् फैच्वलय् ज्वयेगु ज्यां लिक्का: इस्राएलया जिमि मनूतय् जुजु दय्का।

8 छ गन गन वन, जि छनापं च्वना, अले जिं छिमि शत्रुतय् छंगु न्ह्य:नेनं चीकाबिया। आ: जिं छन्त पृथ्वीयापि नांजा:पिं मनूत मध्ये छम्ह दय्काबी।

9 जिं थ: प्रजा इस्राएलया नितिं छगूथाय् ल्यये। जिं अन हे इमित तये अले इपि थ:गु हे देशय् च्वनी। इमित आवलि दु:ख बी मखुत।

10 अले जिं थ: प्रजा इस्राएलया नितिं न्याय याइपिं मनूत ल्ययागु इलनिसें थुखे इमिसं न्हापा दु:ख ब्यू थें दुष्ट मनूतयसं इमित हाकनं गुबलें दु:ख बी मखुत। जिं छिमि सकल शत्रुतय् नं नाश यानाबी।

“ ‘जि परमप्रभुं छंगु नितिं छगू घराना दय्काबी धका: जिं छन्त धाये।

11 छ सिना: छन्त थ: पुर्खातनापं थुनेधुंका: जिं छिमि छम्ह काय्यात जुजु दय्के, अले जिं वयागु राज्ययात बल्लाकाबी।

12 जिगु लागि देग: दय्कीम्ह व हे जुइ, अले जिं वयागु सिंहासन न्ह्याबलेंया लागि पलिस्था याये।

13 जि वया बौ जुइ अले व जिम्ह काय् जुइ। जिं छ स्वया: न्हापा शासन याइम्ह शाऊलपाखें थ:गु माया लित कयागु थें जिं वपाखें धा:सा जिगु सदां दयाच्वनीगु दयामाया गुबलें लित काये मखु।

14 न्ह्याबलेंया लागि वयात जिं थ:गु छें व राज्यया शासक दय्के। अले वयागु सिंहासन न्ह्याबलें दयाच्वनी।”

15 परमेश्वरं वयात धयादीगु फुक्क खँ नातानं दाऊदयात कन।

दाऊदं परमप्रभुयात सुभाय् ब्यूगु

२ शम् ७:१८-२९

16 अले दाऊद दुहां वना: परमप्रभुया न्ह्यःने च्वन, अले वं थथे प्रार्थना यात,

“हे परमप्रभु परमेश्वर, छिं जितः थन तक हयादीत जि सु खः धकाः अले जिगु परिवार छु खः धकाः?

17 हे परमेश्वर, थ्व छिगु मिखाय् चिधंगु खँ जुल, छायाधाःसा छिं थःदासया घरानाया लिपा वइगु ईया बारे धयादिल। हे परमप्रभु परमेश्वर, छिं जितः छम्ह तःधंम्ह मन् भापियादीगु दु।

18 “थः दासयात ब्यूगु इज्जतया बारे दाऊदं छितः मेगु छु धाये फइ धकाः? हे परमप्रभु, छिं थः दासयात म्हस्यू।

19 छिम्ह दासया लागि अले छिगु इच्छा कथं छिं थ्व तःधंगु ज्या यानादीगु दु, अले थुपि फुक्क तःधंगु बचं सीके बियादीगु दु।

20 “हे परमप्रभु, छिं थें मेपि सुं नं परमेश्वर मदु, अले जिमिसं थःगु हे न्हाय्पनं न्यनागु थें छि बाहेक मेम्ह मदु।

21 अले छिगु जाति इस्राएल थें ज्याःगु जाति मेगु छु जाति दु धकाः? उद्धार यायेत परमेश्वर थः हे झाःगु पृथ्वीइ मेगु छु जाति दु ला? छिं मिश्रं थः मन्तयत त्वःतकाः थःगु नां तःधंकादिल, छिं अजू चायापुगु ज्या क्यनादिल अले इमिगु लैय् दंपि जाति जातियात ख्यानाः छवयादिल।

22 छिं थः प्रजा इस्राएलयात न्हाबलेंया लागि थःगु दय्कादीगु दु। अले छि हे परमप्रभु, इमि परमेश्वर जुयादीगु दु।

23 “आः हे परमप्रभु, थः दास व जिगु घरानायात छिं छु बचं बियादीगु खः व न्हाबलेंया लागि थापं जुयाच्वनेमा। छिं बचं बियादीगु थें यानादिसँ।

24 अले व थापं जुइमा व छिगु नां न्हाबलेंया लागि तःधनेमा। अले मन्तयसं थथे धाइ, ‘दक्व शक्ति दुम्ह परमप्रभु इस्राएलयाम्ह खः, वय्कः इस्राएलया लागि हे परमेश्वर खः।’ अले छिं जिगु घरानायात सदा तयातइ।

25 “जिमि परमेश्वर, छिम्ह दासं छिगु न्ह्यःने थ्व प्रार्थना यायेगु आँट यानागु दु छायाधाःसा छिं थुपि फुक्क खँ जि छिम्ह दासयात क्यनादिल अले जिमि सन्तानयात जुजु दय्के धकाः जितः धयादिल।

26 हे परमप्रभु, छि हे परमेश्वर खः, अले छिं थः दासयात थ्व भिंगु बचं बियादीगु दु,

27 व छिगु न्ह्याःने न्ह्याबलेँ दयाच्चनेमा धकाः आः छिं ययकाः थःदासया घरानायात सुवाः बियादीगु दु। परमप्रभु, छिं वयात सुवाः बियादिल अले वयाके न्ह्याबलेँ छिगु सुवाः दइ।”

18

जुजु दाऊद त्याःगु लडाइँया धलः

२ शमू ८:१-१८

1 थुकिया लिपा जुजु दाऊद पलिशतीतयत् हमला यानाः बुकल। अले वं इमिगु गात शहर व उकिया लिक्क लिक्क च्वंगु गां त्याका काल।

2 दाऊदं मोआबीतयत् नं बुकल अले इपिं वयागु अर्धीनय् च्वनाः कर पुलिपि जुल।

3 यफ्रेटिस खुसिया लिक्क च्वंगु लागा त्याका कायेत वनाच्चंम्ह सोबाया जुजु हददेजेरयात दाऊदं हमातया लिक्क बुकल।

4 दाऊदं द्रुःछि गः रथ, न्हयद्रुःम्ह रथ चलय् याइपिं व निइद्रुः न्यासि वनीपिं सिपाइँतयत् कब्जा यात। दाऊदं सछिम्ह सल बाहेक हददेजेरया रथ सालिपिं दक्व सलतयत् खुत्यां यानाबिल।

5 सोबायाम्ह जुजु हददेजेरयात ग्वाहालि यायेत दमस्कस शहरं अरामीत वल। तर दाऊदं इमि निइनिद्रुः सिपाइँतयत् स्यानाबिल।

6 अले दाऊदं अरामया दमस्कस शहरय् प्यखें छाउनीत तल। अरामीतय्सं दाऊदया अर्धीनय् च्वनाः वयात कर पुल। थुकथं दाऊद, न्ह्याथाय् वंसां परमप्रभुं वयात त्याकादिल।

7 दाऊदं हददेजेरया कप्तानतय्गु लुँया ढाल कब्जा यानाः यरूशलेमय् हल।

8 वं हददेजेरया शहरत तेबह व कुनं नं यक्व हे कैय् हल। लिपा सोलोमनं थ्व हे कैय् पुख्, तःधंगु थां व थलबल दय्केगुलिइ छ्यल।✧

9 हमातयाम्ह जुजु तोऊनं सोबायाम्ह जुजु हददेजेरया फुक्क सेनायात दाऊदं बुकूगु खँ न्यन।

10 उकिं वं थःकाय् हदोरमयात दाऊद जुजुयाथाय् हददेजेरयात बुकूगुलि ज्वजलपा यायेत व बधाई बीत छवल। तोऊनं हददेजेरनापं तःक्वः हे लडाइँ याये धुकूगु खः। अले हदोरमं लुँ, वहः व कैय्यागु थीथी कथंयागु थलबल ज्वनाः वल।

11 जुजु दाऊदं उपि थलबल परमप्रभुयात देछाल। वं एदोमी, मोआबी, अम्मोनी, पलिशती व अमालेकीतपाखें काःगु लुँ व वहः नं देछाल।

12 सरूयाहया काय् कप्तान अबीशैनं एदोमीतयत् चियागु ब्यासिइ बुकल। अले वं झिंच्यादुःम्ह एदोमीतयत् स्यात।

13 अबीशैनं एदोमय् छाउनीत तल, अले सकल एदोमीत दाऊदया अधीनय् च्वन। दाऊद न्ह्याथाय् वंसां परमप्रभुं वयात त्याकादिल।

दाऊदया अधिकारीत

14 दाऊदं इस्त्राएल न्यंक शासन यात। वं फुक्कसिगु लागि खःकथं व न्यायकथं ज्या यात।

15 सरूयाहया काय् योआब सेनापति खः, अहीलूदया काय् यहोशापात राज्यया ल्याःचाः तइम्ह खः।

16 अहीतूबया काय् सादोक व अबियाथारया काय् अहीमेलेक पुजाहारीत खः। शब्शा छ्यान्जे खः।

17 यहोयादाया काय् बनायाह करेती व पेलेथीतय् कप्तान खः। अले दाऊदया काय्पि जुजुया ततःधंपि अधिकारी खः।

19

दाऊदं अम्मोनीत व अरामीतयत् त्याकूगु

२ शम् १०:१-१९

1 छुं ई लिपा अम्मोनीतय् जुजु नाहाश सित, अले वया काय् हानून जुजु जुल।

2 दाऊद जुजुं धाल, “जिं हानूनयात माया यायेमाः, छायाःसा वया बौ नाहाश जितः न्ह्याबलें माया याःगु खः।” उकिं बिचाः हनाः वं दूतत छवल।

दाऊदया दूतत अम्मोनय् थयंबलय्

3 अम्मोनी नायःतयसं थः जुजुयात धाल, “छिं स्वयादीबलय् दाऊदं छिमि बाःयात इज्जत यानाः बिचाः हनेत थुपि मनूत छवयाहःगु धकाः च्वनादिया ला? अथे खः हे मखु। वं ला झीगु देश त्याका कायेगु लागिं चिवा कायेत इमित छवयाहःगु खः।”

4 उकिं हानूनं दाऊदया मनूतयत् ज्वनाः इमिगु दाही खानाबिल। अले इमिगु वसः दथुइ जें तक हे चानाबियाः इमित लितछवल।

5 इपिं छैय् लिहां वयेत तसकं मछाल। छुं मनूतयसं वनाः दाऊदयात व खँ कनाबिल, अले दाऊदं इमित दाही ताहा मजुतले यरीहो शहरय् च्वनाच्वँ धकाः खबर छवल।

6 आः जिपि दाऊदया मिखाय तसकं बांमलाःपिं मनूत जुइ धुंकल धकाः हानून जुजु व अम्मोनीतयसं सिल। उकिं इमिसं च्वययागु अराम-नाहारैम, अराम-माका व सोबां रथ व सारथीत बालं कयाहयेत ३४,००० किलोग्राम वहः छवल।

7 इमिसं ३२,००० रथनापं माकाया जुजु व वया सेनात बालं कयाहल। माकायाम्ह जुजुया सेना वयाः मेदबाया लिक्क छाउनी तयाः च्वन। सकल अम्मोनीत नं थथःगु शहरं लडाइँ यायेत पिहां वल।

8 दाऊदं व खँ न्यनाः योआब व वया थः दक्व सिपाइँतयत् इपिं लिसे लडाइँ यायेत छवल।

9 अम्मोनीत वयाः शहरया मू ध्वाखाया न्ह्यःने लडाइँ यायेत तयार जुयाच्वन। ग्वाहालि ब्यूवःपिं जुजुपिन्सं चक्कंगु ख्यलय् थथःगु थाय् काल।

10 योआबं थःगु न्ह्यःने व ल्युने लडाइँया लागि शत्रुया सिपाइँत तयार जुयाच्वंगु खनाः वं इस्राएलयापिं ल्ययातःपिं सिपाइँतय पुचःयात अरामीतलिसें ल्वायेत छवल।

11 ल्यंदुपिं मेपिं सिपाइँतयत् वं थःकिजा अबीशैया अधीनय् तल, अले इमित अम्मोनीत लिसे ल्वायेत छवल।

12 योआबं अबीशैयात धाल, “अरामीतयसं जितः बुकाच्वंगु खन धाःसा छ वयाः जितः ग्वाहालि ब्यू, अम्मोनीतयसं छन्त बुकाच्वंगु खन धाःसा जि वयाः छन्त ग्वाहालि बी।

13 बल्ला व साहसी जु! अले थःगु जाति व झी परमेश्वरया शहरतयगु निंति मग्यासें लडाइँ यायेनु। अले परमप्रभुयात छु याये यः वयकलं व हे यानादी।”

14 अले योआब व वया सिपाइँतयसं अरामीतयत् हमला यात। अरामीत योआब वया सिपाइँतय न्ह्यःनं बिस्सुं वन।

15 अले अरामीत बिस्सुं वनाच्वंगु खनाः अम्मोनीत अबीशैया न्ह्यःनं बिस्सुं वनाः शहर दुने दुहां वन। अनंलि योआब यरूशलेमय् लिहां वल।

16 इस्राएलीतलिसें थःपिं बुइ धुंकूगु खँ अरामीतयसं सिल। इमिसं यफ्रेटिस खुसिया पुर्व हददेजेरया सेनापति शोपकया अधीनय् दुपिं मेपिं अरामीतयत् सःतके छवल।

17 व खँ न्यनाः दाऊदं सकल इस्राएली सिपाइँतयत् मुंकल। दाऊदं इमित यर्दन खुसिया उखे यंकल। वं इस्राएलीतयत् अरामीतय न्ह्यःने थन। अले इमिसं वनापं लडाइँ यात।

18 तर अरामीत इस्राएलीतपाखें बिस्सुं वन। अले दाऊदं इमि न्हयद्रुःमह रथ चलय् याइपिं व पिइद्रुःमह सिपाइँतयत् स्यानाबिल। अले इमिसं अरामी सेनापति शोपकयात नं स्यात।

19 हददेजेरया अधीनय् च्वं पिं जुजुपिन्सं जिमित इस्राएलं त्याकल धकाः सियाः दाऊदलिसें सन्धियात अले वयागु अधीनय् च्वन। अनंलि अरामीतय्सं हाकनं अम्मोनीतय्त ग्वाहालि बीगु इच्छा मयात।

20

रब्बा शहर त्याकूगु

२ शमू १२:२६-३१

1 बसन्तया इलय् योआबं इस्राएलया सेनायात लडाइँया लागि यंकल। थ्व ई जुजुपिं लडाइँ यायेत पिहां वनीगु ई खः। इस्राएलया सेनां अम्मोन देशयात तहसनहस यानाबिल। दाऊद जुजु धाःसा यरूशलेमय् हे च्वन। इमिसं रब्बा शहरयात घेरय् यानाः हमला यात। अले उकियात भज्यंक स्यंकाबिल।

2 दाऊदं इमि जुजुया छेनं लुँयागु श्रीपेच काल। उकियागु तौल स्विन्यागु किलोग्राम दु, उकी रत्नत थुनातःगु दु। दाऊदं व श्रीपेच कयाः थःगु छेनय् पुल। हानं वं शहरं यक्व हे सामान त्याकाहल।

3 वं शहरयापि मन्तय्त पिने पितहल अले इमित कःति, नँया कु व पा ज्वंकाः ज्या याकल। दाऊदं अम्मोनीतय् फुक्क शहरय् थथे हे यात। अनंलि व व वया सकल मन्त यरूशलेमय् लिहां वल।

पलिशतीतलिसे लडाइँ

२ शमू २१:१५-२२

4 उकिया लिपा पलिशतीतलिसें गेजेरय् लडाइँ जुल। उगु लडाइँलय् ह्शाती सिब्बकैनं सिप्पै नांयाम्ह रपाईतय् सन्तानयात स्यात। अले पलिशतीत बुत।

5 पलिशतीतलिसें मेगु लडाइँ जुल। याईरया काय् एल्हानानं गिन्तीयाम्ह गोल्थतया किजा लहमीयात स्यात। लहमीया भाला तसकं ताहा व इयातु। व कापः थाइगु ताहाकःगु डण्डी थें च्वं।

6 हानं गातय् नं लडाइँ जुल, अन ल्हाः व तुतिइ खुपु खुपु पचिंचा अर्थात निइप्यपु पतिंचा दुम्ह राक्षस थें च्वंम्ह छम्ह मनू दु। व नं रफाया सन्तान खः।

7 वं इस्राएलीतय्त हिस्यात, अले दाऊदया दाजु शिमेअया काय् जोनाथनं वयात स्यानाबिल।

8 दाऊद व वया मन्तय्सं स्याःपिं थुपि राक्षस थें च्वंपिं स्वम्ह गातया रफाया सन्तान खः।

21

मनूत ल्याः खानाः दाऊदं पाप याःगु

२ शम् २४:१-२५

1 शैतान इस्राएलया विरोधी जुल। उकिं वं इस्राएलया मनूत ल्याः खायेगु ज्या यायेत दाऊदयात ग्वाकल।

2 दाऊदं योआब व थः सेनाया कप्तानतय्त थथे धाल, “फुक्क इस्राएल देशय् दच्छिनय् च्वंगु बेर्शेबा शहरनिसें उत्तरय् दान तक हूँ, मनूत ल्याः खानाः जितः धा। अले इपि ग्वःम्ह दु धकाः जिं सीके फइ।”

3 योआबं लिसः बिल, “परमप्रभुं इस्राएलयापिं मनूतय्त सछिदुगं अप्वः दयकाबीमा। महाराज, उपि सकलें छसपोलया प्रजा, मखु ला? छिं छाया थथे यानादीगु? छिं इस्राएलय् छाया दोष हयादीगु?”

4 अयनं जुजु दाऊदं थःगु बिचाः महीकू। जुजुं धाःथे हे योआबं यायेमाल। अले योआब वनाः इस्राएल न्यंक चाःहिलाः मनूत ल्याः खानाः यस्शलेमय् लिहां वल।

5 अले योआबं सेनाय् ज्या यायेफुपिं ग्वःम्ह मनू दु धकाः जुजुयात कन। सिपाईं जुयाः ज्या यायेफुपिं मिजंत इस्राएलय् झिंछगू लाख व यहूदाय् प्यंगू लाख व न्हयेदुः मनूत दु।

6 तर योआबं लेवी व बेन्यामीनीतय्त ल्याः मखाः। छायाःसा वयात जुजु दाऊदया थ्व आज्ञा तसकं मयः।

7 परमेश्वरयाःगु मिखाय् नं दाऊदं मभिंगु ज्या याःगु दु, उकिं परमेश्वरं इस्राएलयात सजॉय बियादिल।

8 अले दाऊदं परमेश्वरयात धाल, “जिं थथे यानाः तःधंगु पाप यानागु दु। आः जितः क्षमा यानादिसँ धकाः बिन्ति याये। जिं मूर्ख ज्या यानागु दु।”

9 अले परमप्रभुं दाऊदया अगमवक्ता गादयात थथे धयादिल,

10 “वनाः दाऊदयात धा, ‘परमप्रभुं थथे धयादी, छंगु न्ह्याःने स्वंगू खँ तये, जिं छंगु विरोधय् ज्या यायेत छं उकी मध्ये छगू ल्या!’ ”

11 अले गादं दाऊदयात वनाः धाल, “परमप्रभुं थथे धयादी, छन्त छु यः व ल्यः,

12 स्वंगू दँया अनिकाल, वा स्वला तक शत्रुतपाखें बिस्सुं जुयेगु, वा स्वन्हु तक देशय् परमप्रभुया तरवार, अर्थात इस्राएलय् महामारी जुइगु अले परमप्रभुया दूतं इस्राएल देशया फुक्क थासय् नाश यानाच्चनीगु। आः जिं थःत छवयाहयादीम्हयसित छु लिसः बीगु खः व छिं क्वःछिनादिसँ।”

13 दाऊदं गादयात धाल, “जि तसकं आपतय्लाः गु दु। जितः परमप्रभुया ल्हातय् हे लाके ब्यु। छायाः सा वय्कः तसकं दयादुम्ह खः। तर जि मनूतय्गु ल्हातय् लाये म्वाः लेमा।”

14 उकिं परमप्रभुं इस्राएल न्यंकं छगू महामारी छवयाहयादिल। अले इस्राएलयापि न्हयेदः (७०,०००) मनूत सित।

15 अले परमेश्वरं यरूशलेम नाश यायेत छम्ह स्वर्गदूत छवयाहयादिल। तर वं व नाश यायेत्यंबलय् परमप्रभुं व खनाः उगु नाशपाखें थःगु मन हिकाः उपि नाश याः वःपिं स्वर्गदूतयत धयादिल, “आः गात! छंगु ल्हाः दीकि अबलय् उपि स्वर्गदूत यबूसी अरौनाया खलाया लिक्क दनाच्चंगु खः।”

16 चव्य स्वःबलय् दाऊदं परमप्रभुया स्वर्गदूतयात स्वर्ग व पृथ्वीया दथुइ थःगु नांगा तरवार ज्वनाः यरूशलेमयात नाश यायेत तयार जुयाच्चंगु खन। अले दाऊद व थकालित भांग्रा फिनाः बैय् भवसुल।

17 अले दाऊदं परमेश्वरयात धाल, “मनूतयत ल्याः खायेगु लागि आज्ञा बियाम्ह जि खः। पाप यानाम्ह जि खः। द्रुक्काम्ह जि खः। बिचरा फैतय्सं छु याःगु दु धकाः? हे परमप्रभु जिमि परमेश्वर, जि व जिमि परिवारयात सजौय बियादिसँ अयनं थ्व विपत्ति छिकपिनि मनूतयके मलायेमा।”

18 अले परमप्रभुया दूतं गादयात दाऊदयात यबूसी अरौनाया खलाय् वनाः परमप्रभुया निंति छगू वेदी दय्केत आज्ञा ब्यू धकाः धाल।

19 दाऊदं परमप्रभुया उजं मानय् यात अले गादं धाःथें थाहां वन।

20 उबलय् अरौना व वया प्यम्ह कायपि थःगु खलाय् छव दयाच्चंगु खः। इमिसं स्वर्गदूतयात खंबलय् प्यम्ह कायपि सुलेत बिस्सुं वन।

21 भचा लिपा अन दाऊद थ्यंकः वल, अरौनां जुजुयात खनेवं खला त्वःता वल अले बैय् छ्यं भवसुलाः दाऊदयात भागि यात।

22 दाऊदं वयात धाल, “छं जितः छंगु खला म्यु, थ्व महामारी पनेत अन परमप्रभुया निंति छगू वेदी दय्के। जिं छन्त उकियागु पूरा मू बी।”

23 अरौनं दाऊदयात धाल, “महाराज, कयादिसँ! छितः छु याये मास्ति वः, व यानादिसँ। जिं छितः होमबलिया लागि द्रुहंत, छवय्केगु लागि थुपि छव दयेगु सिंपौत व अन्नबलिया निंति छव बी। जिं थ्व फुक्क छितः बी।”

24 तर जुजुं वयात लिसः बिल, “मखु, जिं छन्त पूरा मू बी। छंगु सामान कयाः सितिकं लाःगु सामानं परमप्रभुयात होमबलि छायेगु मखु।”

25 अले वं अरौनायात व खलाया लागि खुसः लुँया धिबा बिल।

26 अन वं परमप्रभुया निति छगू वेदी दय्काः होमबलि व मेलबलि छायाः तसलं परमप्रभुया नां कयाः प्रार्थना यात। अले परमप्रभुं स्वर्ग होमबलिया वेदीइ मि छवयाहयाः लिसः बियादिल।

27 परमप्रभुं स्वर्गदूतयात थःगु ल्हातय् दुगु तरवार दापय् तयेत आज्ञा बियादिल, अले स्वर्गदूतं अथे हे यात।

28 उबलय् परमप्रभुं थःत यक्सी अरौनाया खलाय् लिसः बियादीगु दाऊदं खन, उकिं दाऊदं अन पशुत बां बिल।

29 मस्भूमिइ मोशां दय्कूगु नापलायेगु पाल व होमबलिया वेदी उबलय् तक गिबोनया आराधना यायेगु थासय् हे दुगु जुयाच्चन।

30 तर दाऊद परमेश्वरयात आराधना यायेत अन वनेमफु, छायाःसा परमप्रभुया स्वर्गदूतया तरवार खनाः व तसकं ग्याः।

22

1 अले दाऊदं धाल, “थ्व थासय् परमप्रभु परमेश्वरया देगः व इस्राएलयापि मनूतय्सं होमबलि छायेत वेदी दइ।”

देगः दय्केत तयारी

2 उकिं दाऊदं इस्राएलय् च्वनाच्चपि परदेशीतय्त छथाय् मुनेगु आज्ञा बिल, अले इपिं मध्ये वं ल्वहं कःमि मनूत ल्यल। इमिगु ज्या परमेश्वरया देगः दय्केत ल्वहं चायेगु खः।

3 वं ध्वाखाया लागिं नकिं व कब्जा दय्केत यक्व न बिल। अले कँय् नं लने हे मफयेक बिल।

4 अले दाऊदं ल्याः हे खायेमफय्कः यक्व देवदास्या सिँ नं मुंकल। छायाःसा सीदोन व टुरोसयापि मनूतय्सं यक्व हे देवदास्या सिँ हःगु खः।

5 दाऊदं धाल, “परमप्रभुया निति दय्कीगु देगः फुक्क जातिया मिखाय् तःजिगु नांजाःगु व तसकं बांलाःगु जुइमा। जिमि काय् सोलोमन ल्याय्महचा हे तिनि, उकिं देगः दय्केत जिं हे फुक्क तयार यायेमा।” अथे जुयाः थः सी न्ह्यः दाऊदं यक्व सामान जोरय् यात।

6 अले वं थःकाय् सोलोमनयात सःताः परमप्रभु इस्राएलया परमेश्वरया निति छगः देगः दय्केत आज्ञा बिल।

7 वं सोलोमनयात धाल, “हे जिमि काय्, थः परमप्रभु परमेश्वरया नांया लागि जितः देगः छगः दय्के मास्ति वःगु ला खः।

8 तर परमप्रभुं जितः थथे धयादिल, ‘छं यक्व लडाइँ याःगु दु, अले यक्व मन्तयत् स्याःगु दु। छं जिगु नांया निंति थ्व देगः दय्के खनी मखु, छायाःसा छं जिगु न्ह्यःने बैय् यक्व हि बाः वय्कूगु दु।

9 तर छिमि छम्ह काय् दइ, व शान्ति यःम्ह मन् जुइ। जिं प्यखेरं वया शत्रुतपाखें वयात शान्ति बी। वयागु नां सोलोमन जुइ, व इस्राएलय् जुजु जुयाच्चंतले जिं इस्राएलयात सुख व शान्ति बी।*

10 वं हे जिगु नांया निंति छगः देगः दय्की। व जिम्ह काय् जुइ, जि वया बाः जुइ। वया वंशयाम्ह छम्हयसिनं इस्राएलय् न्ह्याबलें शासन याइ।”

11 दाऊदं थथे नं धाल, “जिमि काय्, आः परमप्रभु थः छलिसे दयेमा अले वय्कलं छं हे व दय्कि धकाः धयादी थें छ ताःलायेमा। थः परमप्रभु परमेश्वरया देगः दय्कि।

12 परमप्रभुं छन्त इस्राएलया अधिकार बियादीबलय् छं परमप्रभु छिमि परमेश्वरयागु व्यवस्था पालन यायेत वय्कलं छन्त बुद्धि व ज्ञान बियादीमा।

13 छं परमप्रभुं मोशापाखें इस्राएलयात बियादीगु विधि व नियम बांलाक मानय् यात धाःसा छ ताःलाइ। साहसी व बल्लाः जु। ग्याये मते वा नुगः क्वतुंके मते।

14 “जिं परमप्रभुया देगः दय्केत दुःख यानाः ३,४०० टन लुँ व ३४,००० टन वहः मुंकागु दु। उलि जक मखु लने हे मफय्कः कैय् वन नं मुंकागु दु। जिं सिँ व ल्वहं नं यक्व हे तयार यानागु दु, तर छं उकी मेगु तने फु।

15 छंके ज्या याइपिं मन्त यक्व दु। ल्वहं कःमित, ल्वहं चाइपिं व सिँकःमितनापं फुक्क कथंया ज्या याये सःपिं मन्त दु।

16 लुँ, वहः, कैय् व नया ज्या याइपिं शिल्पकारत अल्याख दु। आः ज्या शुरु या, परमप्रभु छलिसे दयेमा।”

17 दाऊदं इस्राएलयापिं सकल नायःतयत् थःकाय् सोलोमनयात ग्वाहालि बीगु आज्ञा बिल।

18 “वं इमित धाल, परमप्रभु छिमि परमेश्वर छिपिनापं च्वनादीगु दु, अले फुक्कपाखें छिमित शान्ति बियादीगु दु। वय्कलं थ्व देशय् च्वपिं मन्तयत् जिगु ल्हातय् तयादीगु दु अले देश परमप्रभु व वय्कःया जातिया अधीनय् दु।

* 22:9 २२:९ सोलोमनया सः हिब्रूयागु शान्ति कयातःगु थें च्वं

19 अले थःगु पूरा मन बिया व बलं फत्तले परमप्रभु थः परमेश्वरया सेवा या। देगः दय्केगु ज्या शुरु या अले परमप्रभुयात इज्जत बीत दय्केगु उगु देगलय् बाचा चिनातःगु सनू व परमेश्वरया पवित्र थलबल ति।”

23

लेवीतयगु ज्या

- 1 दाऊद बुरा जुल, उकि वं थःकाय् सोलोमनयात इस्राएलयाम्ह जुजु दय्कल।
- 2 दाऊदं इस्राएलयापि कुलनायः, पुजाहारीत व लेवीतय् मुंकल।
- 3 वं स्विदै व स्विदै च्वय्यापि लेवीतय् ल्याः खात, इपि दक्व यानाः स्विच्याद्मःमिजं दु।
- 4 जुजुं नीइप्यद्मःमिजं ननूतय् देगःया ज्या स्वयेत, खुद्गःयात हाकिम व न्याय यायेत,
- 5 प्यद्गःयात लुखा पिवाः च्वनेत व प्यद्गःयात दाऊदं दय्कूगु बाजं थानाः परमप्रभुया प्रशंसा यायेत ल्यल।
- 6 दाऊदं इमित लेवीतय् काय्पि – गेशोर्न, कहात व मरारीया नांकथं भाग भाग यानाः ब्वथल।

गेशोर्नीत

- 7 गेशोर्नया निम्ह काय्पि – लादान व शिमी खः।
- 8 लादानया स्वम्ह काय्पि दु – तःधिकःम्ह काय् यहीएल, जेताम व योएल खः।
- 9 थुपि स्वम्ह काय्पि – लादानया परिवारयापि नायःत खः।
- शिमीया स्वम्ह काय्पि – शलोमोत, हजीएल व हारान।
- 10 शिमीया मेपि प्यम्ह काय्पि – यहत, जीजा, येऊश व बरीआ।
- 11 यहत दकलय् तःधिकःम्ह व जीजा निम्हम्ह काय् खः। तर येऊश व बरीआया यक्व काय्म्व्याय्पि मदु। उकि येऊश व बरीआयात छगू हे परिवारकथं ल्याः खाइगु। उकि येऊश व बरीआयात छगू हे परिवारकथं ल्याः खात अले छगू हे ज्या बिल।

कहातीत

- 12 कहातया प्यम्ह काय्पि – अग्राम, यिसहार, हेब्रोन व उज्जीएल।
- 13 अग्रामया काय्पि – हारून व मोशा। हारूनयात ब्यागलं तःगु खः। व अले वया सन्तानयात न्ह्याबलेंया लागि तच्चकं पवित्रगु सामान देछायेत, परमप्रभुया न्ह्यःने

बलि छायेत, वयक्ःया न्ह्यःने सेवा यायेत अले न्ह्याबलेंया लागि वयक्ःया नामय् मनूतयत् सुवाः बीत ब्यागलं तःगु खः।

14 परमेश्वरया मनू मोशाया कायपिन्त लेवी कुलय् ल्याः खात।

15 मोशाया कायपिं – गेशोम व एलीएजर।

16 गेशोमया काय् शूबाएल नायः खः।

17 एलीएजरया छम्ह हे जक काय् रहब्याह खः, तर रहब्याहया यक्व कायपिं दु।

18 यिसहारया कायपिं – मध्ये दक्वसिबय् तःधिकःम्ह काय् शलोमीत खः।

19 हेब्रोनाया कायपिं – दकलय् तःधिकःम्ह यरियाह, निम्हम्ह अमर्याह, स्वम्हम्ह यहासेल अले प्यम्हम्ह यकमाम।

20 उज्जीएलया कायपिं – दक्वसिबय् तःधिकःम्ह काय् मीका, व निम्हम्ह यिशियाह।

मरारीत

21 मरारीया कायपिं – महली व मूशी।

महलीया कायपिं – एलाजार व कीश।

22 तर एलाजारया म्हायपिं जक दु। छम्ह हे काय् मदय्कं हे व सित। वया म्हायपिन्सं थःथितिपिलिसें ब्याहा यात। इमि थःथिति कीशया कायपिं खः।

23 मूशीया स्वम्ह कायपिं – महली, एदेर व यरीमोत।

24 धलखय् परिवार परिवारकथं नां च्वयातःपिं लेवीया सन्तान थुपिं खः। इपिं थथःगु परिवारया नायःत खः। धलखय् च्वयातःपिं निइदँ व स्वयां च्वय्यापिं खः। इपिं परमप्रभुया देगलय् सेवा याइपिं खः।

25 दाऊदं धाःगु खः, “परमप्रभु इस्राएलयाम्ह परमेश्वरं थः मनूतयत् शान्ति बियादीगु दु। अले न्ह्याबलेंया लागि यरूशलेमय् च्वनेत झाःगु दु।

26 उकिं आवंलि लेवीतय्सं नापलायेगु पाल व आराधनाय् छ्यलिगु सामान क्वबियाः जुइ मालि मखुत।”

27 दाऊदया लिपांगु आज्ञा कथं निइदँ व व स्वयां च्वय्यापिं फुक्क लेवीतय्गु नां सेवाया ज्या यायेत धलखय् च्वल।

28 लेवीतय्गु ज्या परमप्रभुया देगःयागु आराधनाया ज्याय् हासूनया सन्तानतयत् ग्वाहालि बीगु खः। चुक व कोथाया रेखदेख यायेगु, फुक्क पवित्र ज्वलं शुद्ध यायेगु, परमेश्वरया देगःयागु आराधनाया मे मेगु ज्या यायेगु,

29 देहागु मरि टेबुलय् मिलय् यायेगु, अन्नबलिया छुचुं, सोडा मतःगु मरि, छुगु व चिकनय् छुनातःगु मरि, ढक व नापय् यायेगु व लनेगु फुक्क ज्याया जिम्मा इमिगु खः।

30 इपि न्हाबलें सुथय् व बहनि परमप्रभुयात सुभाय् बीत व प्रशंसा यायेत दने नं माः।

31 परमप्रभुयात विश्रामया न्हिइ, अमाइया नखबलय् व फुक्क मेगु क्वःछिनातःगु नखःचखःबलय् ल्यायाः नियमकथं फुक्क होमबलि न्हियान्हिथं छायेगु जिम्मा नं लेवीतयगु खः।

32 थुकथं लेवीतयसं नापलायगु पालया नितिं, पवित्र थाय्या नितिं व इमि थःथिति हासूनया सन्तानतय् अधीनय् च्वनाः परमप्रभुया देगःया सेवाया नितिं थःपिन्सं यायेमाःगु ज्या याइगु।

24

पुजाहारीतयगु ज्या

1 हासूनया सन्तानयात थुकथं पुचः पुचः यानाः ब्यागलं तःगु खः। हासूनया काय्पि नादाब, अबीह, एलाजार व ईतामार खः।

2 नादाब व अबीह धाःसा थः बौ स्वयां न्हापा हे सित, इमि सुं काय्पि मदु। उकिं एलाजार व ईतामार पुजाहारीया ज्या यात।

3 दाऊद जुजुं हासूनया सन्तानयात इमिगु ज्याकथं पुचः पुचः यानाः ब्यागलं तयाबिल। उगु ज्या यायेत वयात एलाजारया काय् सादोक व ईतामारया काय् अहीमेलेकं ग्वाहालि बिल।

4 एलाजारया सन्तानयात झिंखुगु पुचलय् ब्यागलं तयाब्यगु खः। अले ईतामारया सन्तानयात च्यागु पुचलय् ब्यागलं यानाब्यगु खः। एलाजारया परिवारय् ईतामारया परिवारय् स्वयाः यक्व परिवार नायःत दुगुलि अथे याःगु खः।

5 एलाजार व ईतामार निम्हयसिया सन्तानया दथुइ तःम्ह हे देगःया हाकिमत व परमेश्वरया हाकिमत दुगुलि सुयागुं नं पँ मलीसैं चिष्टा तयाः इमित ब्यागलं तयाबिल।

6 चिष्टा तइगु ज्या नं एलाजार व ईतामारया सन्तानं पालंपाः याइगु। अनंलि इमिगु नां छम्ह लेवी छ्यान्जे नतनेलया काय् शमायाहं च्वइगु। जुजु, जुजुया भारदारत, पुजाहारी सादोक, अबियाथारया काय् अहीमेलेक, लेवी परिवार व पुजाहारी परिवारया नायःत फुक्क साक्षी च्वनीगु।

7 न्हापांगु चिष्टा यहोयारीबया नामय्, निगुगु यदायाहया नामय्,

8 स्वंगूगु हारीमया नामय्, प्यंगूगु सोरीमया नामय्,

- 9 न्यागू मल्कियाहया नामय, खुगू मियामीनया नामय,
 10 न्हयगू हक्कोसया नामय, च्यागू अबियाया नामय,
 11 गुंगू येशूअया नामय, झिगू शकन्याहया नामय,
 12 झिंछगू एल्यासीबया नामय, झिनिगू याकीमया नामय,
 13 झिंस्वंगू हुप्पाया नामय, झिंप्यंगू येशेबाबया नामय,
 14 झिंन्यागू बिल्गाया नामय, झिंखुगू इम्मेरया नामय,
 15 झिंन्हयगू हेजीरया नामय, झिंच्यागू हप्पिसेसया नामय,
 16 झिंगुगू पतहियाहया नामय, निङगू यहजेकेलया नामय,
 17 निङ्छगू याकीनया नामय, निङ्निगू गमूएलया नामय,
 18 निङ्स्वंगू दलायाहया नामय, व निङ्प्यंगू माज्याहया नामय लात।
 19 परमप्रभु इस्राएलयाम्ह परमेश्वरयागु आज्ञा मानाय याना: इमि पुर्खा हास्नं पलिस्था यानाथकूगु थ्व नियमकथं इपिं परमप्रभुया देगलय् थःगु सेवाया ज्या या: वनीबलय् इमिगु ज्या थ्व हे खः।

ल्यंदुपिं लेवीत

- 20 ल्यंदुपिं लेवीया सन्तानया मेपिं परिवारया नायःतपाखें – अम्नामया काय्पिपाखें – शूबाएल, शूबाएलया काय्पिपाखें – येहदयाह।
 21 रहब्बाहया सन्तानपाखें – यिशियाह, यिशियाह जेठाम्ह खः।
 22 यिसहारयापिपाखें – शलोमोत। शलोमोतया काय्पिं – यहत।
 23 हेब्रोनेया सन्तान न्हापाम्ह यरियाह, निम्हम्ह अमर्याह, स्वम्हम्ह यहासेल, प्यम्हम्ह यकमाम।
 24 उज्जीएलया सन्तान – मीका। मीकाया सन्तानपाखें – शामीर।
 25 मीकाया किजा यिश्याह। यिश्याहया सन्तानपाखें – जकरिया।
 26 मरारीया सन्तान – महली व मूशी। यजियाहया सन्तान बनो।
 27 मरारीया सन्तान – यजियाहपाखें बनो, शोहम, जक्कूर व इब्री।
 28 महलीपाखें – एलाजार। एलाजारया सुं नं सन्तान मदु।
 29 कीशया सन्तान यरहमेल।
 30 अले मूशीया सन्तान – महली, एदेर व यरीमोत।
 लेवीत थथःगु परिवारकथं थुपिं हे खः।
 31 जुजु दाऊद, सादोक, अहीमेलेक, अले पुजाहारी व लेवीतय् नायःतय्गु न्ह्यःने थः थःथिति हास्नया सन्तानतय्सं याःगु थें इमिसं नं चिष्टा तल। दकलय् तःधिकःम्ह दाजुया परिवारतय्त दकलय् चिधिकःम्हसिया परिवारयात थें हे व्यवहार यात।

25

देगल्य् म्ये हालीपि

1 दाऊद व वया सेनापतितयस् आसाप, हेमान व यदूतूनया परिवारपिं छुं मनूतयूत सारंगी, वीणा व भुस्या थाना: अगमवाणी धायेत अलग तल। इमिगु धल: थथे दु —

2 आसापया कायपिपाखें — जक्कूर, योसेफ, नतन्याह व असरेला। इमिसं आसापं धा:थें याइगु, आसापं जुजुया आज्ञा कथं अगमवाणी याइगु खः।

3 यदूतूनया कायपिपाखें — गदल्याह, सेरी, यशयाह, शिमी, हशब्याह व मन्तित्याह। थुपि खुम्हयसिनं थः बौ यदूतूनं धा:थें याइगु। यदूतूनं परमप्रभुया प्रशंसा याइबलय वीणा थाना: अगमवाणी याइगु।

4 हेमानया कायपिपाखें — बुक्कियाह, मन्तित्याह, उज्जीएल, शूबाएल, यरीमोत, हनन्याह, हनानी, एलीआता, गिदलती, रोममती-एजेर, योशबाकाशा, मल्लोती, होतीर व महजीओत।

5 थुपि सकलें जुजुया अगमवक्ता हेमानया कायपि खः। वयात थुपि परमेश्वरयात तःधकेत वय्क्ःया बचंकथं ब्यूगु खः। परमेश्वरं हेमानयात झिंप्यम्ह कायपि व स्वम्ह म्हायपि बियादिल।

6 थुपि सकलें परमप्रभुया देगल्य् भजन हालेत थः बौया अधीनय् दु, अले थुमिसं भुस्या: वीणा व सारंगी थाना: परमेश्वरया देगःयागु सेवा याइगु खः। आसाप, यदूतून व हेमान जुजुया अधीनय् दु।

7 इमि थःथितिनापं इमिगु ल्या: निसः व चयच्याम्ह दु अले इपि सकलें परमप्रभुया लागि संगीत सय्कातःपिं सीप दुपि खः।

8 ल्याय्म्ह, बुरा, स्यनामि व ब्वनामि सकसिनं इमिगु ज्याया पा: नितिं चिष्टा तल।

9 न्हापांगु चिष्टा आसापया नितिं खः, व योसेफ, वया कायपि व वया दाजुकिजापिनिगु नामय् लात, १२ म्ह।

निगूगु चिष्टा गदल्याह, वया कायपि व वया दाजुकिजापिनिगु नामय् लात, १२ म्ह।

10 स्वंगूगु चिष्टा जक्कूर, वया कायपि व वया दाजुकिजापिनिगु नामय् लात, १२ म्ह।

11 प्यंगूगु चिष्टा यिस्री, वया कायपि व वया दाजुकिजापिनिगु नामय् लात, १२ म्ह।

12 न्यागूगु नतन्याह, वया कायपि व वया दाजुकिजापिनिगु नामय् लात, १२ म्ह।

13 खुगू बुक्कियाह, वया काय्पि व वया दाजुकिजापिनिगु नामय् लात, १२ म्ह।

14 न्हयगू यसरेला, वया काय्पि व वया दाजुकिजापिनिगु नामय् लात, १२ म्ह।

15 च्यागू चिष्टा यशयाह, वया काय्पि व वया दाजुकिजापिनिगु नामय् लात, १२ म्ह।

16 गुंगू चिष्टा मत्तन्याह, वया काय्पि व वया दाजुकिजापिनिगु नामय् लात, १२ म्ह।

17 झिगू चिष्टा शिमी, वया काय्पि व वया दाजुकिजापिनिगु नामय् लात, १२ म्ह।

18 झिंछगू चिष्टा अजेल, वया काय्पि व वया दाजुकिजापिनिगु नामय् लात, १२ म्ह।

19 झिंनिगू चिष्टा हशब्याह, वया काय्पि व वया दाजुकिजापिनिगु नामय् लात, १२ म्ह।

20 झिंस्वंगू चिष्टा शूबाएल, वया काय्पि व वया दाजुकिजापिनिगु नामय् लात, १२ म्ह।

21 झिंप्यंगू चिष्टा मत्तित्याह, वया काय्पि व वया दाजुकिजापिनिगु नामय् लात, १२ म्ह।

22 झिंन्यागू चिष्टा यरीमोत, वया काय्पि व वया दाजुकिजापिनिगु नामय् लात, १२ म्ह।

23 झिंखुगू चिष्टा हनन्याह, वया काय्पि व वया दाजुकिजापिनिगु नामय् लात, १२ म्ह।

24 झिंन्हयगू चिष्टा योश्बाकाशा, वया काय्पि व वया दाजुकिजापिनिगु नामय् लात, १२ म्ह।

25 झिंच्यागू चिष्टा हनानी, वया काय्पि व वया दाजुकिजापिनिगु नामय् लात, १२ म्ह।

26 झिंगंगू चिष्टा मल्लोती, वया काय्पि व वया दाजुकिजापिनिगु नामय् लात, १२ म्ह।

27 निङ्गू चिष्टा एलीआता, वया काय्पि व वया दाजुकिजापिनिगु नामय् लात, १२ म्ह।

28 निङ्छगू चिष्टा होतीर, वया काय्पि व वया दाजुकिजापिनिगु नामय् लात, १२ म्ह।

29 निङ्निगू चिष्टा गिद्लती, वया काय्पि व वया दाजुकिजापिनिगु नामय् लात, १२ म्ह।

30 निङ्स्वंगू चिष्टा महजीओत, वया काय्पि व वया दाजुकिजापिनिगु नामय् लात, १२ म्ह।

31 निइप्यंगू चिष्टा रोममती-एजेर, वया काय्पि व वया दाजुकिजापिनिगु नामय् लात, १२ म्ह।

26

देगःया ध्वाखा पिवाःत

1 ध्वाखा पिवाःतयगु पुचःत थथे दु –

कोरहीतपाखें – कोरया काय् मेशेलेम्याह, कोरे आसापया सन्तान मध्ये छम्ह खः।

2 मेशेलेम्याहया काय्पि दक्वसिबय् तःधिकःम्ह जकरिया निम्हम्ह येदीएल, स्वम्हम्ह जबदियाह, प्यम्हम्ह यत्नीएल,

3 न्याम्हम्ह एलाम, खुम्हम्ह येहोहानान, अले न्हयम्हम्ह एल्यहोएनै खः।

4 ओबेद-एदोमया नं काय्पि दु – दक्वसिबय् तःधिकःम्ह शमायाह निम्हम्ह यहोजाबाद, स्वम्हम्ह योआ, प्यम्हम्ह साकार, न्याम्हम्ह नतनेल,

5 खुम्हम्ह अम्मीएल, न्हयम्ह इस्साखार, अले च्याम्हम्ह पुल्लतै खः। (छाय्धाःसा परमेश्वरं ओबेद-एदोमयात सुवाः बियादीगु खः।)

6 वया काय् शमायाहया नं काय्पि दु। इपि तसकं बहादुर जूगुलि इमिसं थः बौया परिवारयात अधिकार याइगु खः।

7 शमायाहया काय्पि ओत्नी, रपाएल, ओबेद व एल्जाबाद। इमि थःथिति एलीह व समक्याह नं बहादुर मनूत खः।

8 थुपि सकलें ओबेद-एदोमया सन्तान खः। इपि, इमि काय्पि व इमि थःथितिपि थ्व ज्या यायेफुपि व बहादुर मनूत खः। इपि फुक्क ६२ म्ह दु।

9 मेशेलेम्याहया झिंच्याम्ह बहादुर काय्पि व थःथितिपि दु।

10 मरारी होसाया काय्पि – न्हापाम्ह शिग्री (व दकलय् तःधिकःम्ह मखु, अय् नं वया बौनं वयात न्हापाम्ह दय्काब्यूगु खः),

11 निम्हम्ह हिल्कियाह, स्वम्हम्ह तबलियाह व प्यम्हम्ह जकरिया। होसाया काय्पि व थःथितिपि फुक्क १३ म्ह दु।

12 थुपि ध्वाखा पिवाःतयगु पुचः पुचःयात इमि परिवारया नायःतय् लागिं ल्यल। अले इमिसं मेपि लेवीतय्सं थें परमप्रभुया देगलय् सेवा यात।

13 चिधिकःपि व तःधिकःपि सकसिनं थथःगु पुर्खाया परिवारकथं छगू छगू ध्वाखाया नितिं चिष्टा तल।

14 पुर्ब ध्वाखाया चिष्टा शेलेम्याहया नामय् लात। अनंलि वया काय् जकरियाया नामय् उत्तरया ध्वाखा लात। जकरियां न्ह्याबलें भिंगु सल्लाह बीगु खः।

15 दच्छिन ध्वाखाया चिष्टा ओबेद-एदोमया नामय् लात। अले धुकूया चिष्टा वया काय्पिनिगु नामय् लात।

16 पच्छिमया ध्वाखा व च्वय्पाखे देगलय् वनीगु शल्केत धाःगु ध्वाखाया चिष्टा शुप्पीम व होसाया नामय् लात।

छम्ह पिवाः च्वनीम्ह मेम्ह पिवाः च्वनीम्ह मनूया लिक्कसं च्वनीगु।

17 खुम्ह लेवीत न्हियान्थिं पुर्बपाखे, प्यम्ह उत्तरपाखे, प्यम्ह दच्छिनपाखे, व निम्ह निम्ह धुकूया पिवाः च्वनीगु।

18 अले पच्छिमया चुकय् वनीगु लैय् प्यम्ह व चुकय् हे निम्ह पिवाः च्वनीगु।

19 कोरही व मरारीया सन्तानयात ब्यूगु पिवाः च्वनेगु ज्या थ्व हे खः।

दांभरित व मेपिं हाकिमत

20 परमेश्वरया धुकू व परमप्रभुयात छाःगु सामान तयेगु धुकूया जिम्मा इमि मेपिं लेवी पासापिनिगु खः।

21 गेशोर्नया काय् लादान यहीएलया बाः खः। लादान यक्व हे परिवारया पुर्खा खः।

22 यहीएलीया निम्ह काय्पि जेताम व योएलया जिम्माय् परमप्रभुया देगःया धुकू व मेमेगु सामानया धुकू दु।

23 अम्रामीत, यिसहारीत, हेब्रोनीत, व उज्जीएलीतपाखें -

24 मोशाया काय् गेशोर्मया सन्तान शूबाएल देगःया धुकू नायः खः।

25 एलीएजरपाखें वया थःथितिपिं थुपिं खः - वया काय् रहब्याह, रहब्याहया काय् यशयाह, यशयाहया काय् योराम, योरामया काय् जिक्की, जिक्कीया काय् शलोमीत।

26 दाऊद जुजु, परिवार परिवारया नायःत व द्रःछिम्ह व सछिम्ह सिपाईतय् व सेनाया मेपिं नायःतय्सं देछाःगु सामानया धुकूया फुक्क जिम्मा शलोमीत व वया थःथितिपिन्त ब्यूगु खः।

27 लडाईलय् त्याकाहःगु छुं छुं सामानत परमप्रभुया देगः ल्हनेत इमिसं देछाःगु खः।

28 अगमवक्ता शमूएल, कीशया काय् शाऊल, नेरया काय् अबनेर व सस्याहया काय् योआबं मेगु देछाःगु फुक्क सामान शलोमीत व वया थःथितितय्गु जिम्माय् दु।

मेपिं लेवीतय्गु जिम्मा

29 यिसहारीतपाखें — कनन्याह व वया कायपिन्त इस्राएलीतयगु पिनेया ज्याया लागि हाकिम व न्याय यायेगु ज्याया जिम्मा ब्यगु खः।

30 हेब्रोनीतपाखें — हशब्याह व वया झिन्हयसः बहादुर मनूतयत यर्दन खुसिया पच्छिमपाखे इस्राएलय् परमप्रभुया फुक्क ज्या स्वयेत व जुजुया सेवाया लागि ल्यःगु खः।

31 हेब्रोनीतय नायः यरियाह खः। दाऊद जुजु जगू पिङ्गगु दँय हेब्रोनीतयगु वंशावलीइ माला स्वल। अले उगु परिवारयापि मू मू मनूत गिलादया याजेरय् च्वनाच्चंगु लुङ्कल।

32 दाऊद जुजुं यरियाहया थःथितितपाखें परिवार परिवारयापि निद्रः व न्हयसःमह नायःतयत ल्यल, अले इमित स्बेनीत, गादीत व मनश्शेया बच्छि कुलया निति जुजुयागु ज्या व परमेश्वरयागु ज्या स्वयेगु जिम्मा बिल।

27

सेनाया कप्तानत ल्यःगु

1 दँयदसं छगू छगू लाय् २४,००० म्ह मनूया पुचलं इस्राएलया सेनाय् सिपाईं जुयाः ज्या याइगु। उगु पुचलय् थुपि सिपाईंतयगु ज्या स्वयाः जुजुया सेवा याइपि द्वःछिम्ह सिपाईंया कप्तानत, सछिम्ह सिपाईंया कप्तानत व इमि हाकिमत दु। इस्राएलया सेनाय् ज्या याइपि इपि इस्राएलीतयगु धलः थथे दु —

2 न्हापांगु लाया न्हापांगु पुचःया कप्तान जब्दीएलया काय् याशोबाम खः। वयागु पुचलय् २४,००० म्ह मनू दु।

3 व फारेसया सन्तान खः अले न्हापांगु लाया निति फुक्क फौजया नायःतय् मूम्ह खः।

4 निगूगु लाया निति पुचःया कप्तान अहोही दोदै खः। वयागु पुचलय् मिक्लोत न्ह्यलुवाः खः। इमिगु पुचलय् २४,००० म्ह दु।

5 स्वंगूगु लाया निति कप्तान पुजाहारी यहोयादाया काय् बनायाह खः। व नायः खः। वयागु पुचलय् २४,००० म्ह मनू दु।

6 थ्व बनायाह उपि स्विम्ह बहादुरपि मध्ये छम्ह व उपि स्विम्हया नायः खः। वया लिपा वया काय् अम्मीजाबाद वयागु थासय् वल।

7 प्यंगूगु लाया निति प्यम्हम्ह कप्तान योआबया किजा असाहेल खः। वया लिपा वया काय् जबदियाह वयागु थासय् वल। वयागु पुचलय् २४,००० म्ह मनू दु।

8 न्यागूगु लाया निति न्याम्हम्ह कप्तान यिज्याही शम्हूत खः। वयागु पुचलय् २४,००० म्ह मनू दु।

9 खगूगु लाया निति खूम्हम्ह कप्तान तकोयाम्ह इक्केश्या काय् ईरा खः। वयागु पुचलय् २४,००० म्ह मनू दु।

10 न्हयगूगु लाया निति न्हयूम्हम्ह कप्तान एफ्राइम कुलयाम्ह पेलोनी हेलेस खः। वयागु पुचलय् २४,००० म्ह मनू दु।

11 च्यागूगु लाया निति च्याम्हम्ह कप्तान जेरह वंशयाम्ह ह्शाती सिब्वकै खः। वयागु पुचलय् २४,००० म्ह मनू दु।

12 गुंगूगु लाया निति गुम्हम्ह कप्तान बेन्यामीनया अबीएजेर अनातोती खः। वयागु पुचलय् २४,००० म्ह मनू दु।

13 झिगूगु लाया निति झिम्हम्ह कप्तान जेरहया वंशयाम्ह नतोपाती महैरै खः। वयागु पुचलय् २४,००० म्ह मनू दु।

14 झिंछगूगु लाया निति झिंछम्हम्ह कप्तान एफ्राइम कुलयाम्ह बनायाह पिरातोनी खः। वयागु पुचलय् २४,००० म्ह मनू दु।

15 झिनिगूगु लाया निति झिनिम्हम्ह कप्तान ओत्निएल वंशयाम्ह हेल्लै नतोपाती खः। वयागु पुचलय् २४,००० म्ह मनू दु।

कुल कुलया हाकिमत

16 इस्राएलया कुल कुलया मू मू हाकिमत थुपिं खः –

रुबेन कुल – जिक्कीया काय् एलीएजर,

शिमियोन कुल – माकाया काय् शपत्याह,

17 लेवी कुल – कमूएलया काय् हशब्ब्याह,

हारून – सादोक,

18 यहूदा कुल – एलीहू धाःम्ह दाऊदया दाजु,

इस्साखार कुल – मिखाएलया काय् ओम्मी,

19 जबूलन कुल – ओबदियाया काय् यिश्मायाह,

नप्ताली कुल – अज्जीएलया काय् यरीमोत,

20 एफ्राइम कुल – अजज्याहया काय् होशिया,

मनश्शेया बच्छि कुल – पदायाहया काय् योएल,

21 गिलादय् दुगु मनश्शेया बच्छि कुल – जकरियाया काय् इद्दो।

बेन्यामीन कुल – अबनेरया काय् यासीएल।

22 दान कुल – अबनेरया काय् अज्जेल।

इस्राएलया कुल कुलया मू हाकिमत थुपिं हे खः।

23 दाऊदं निइदँ स्वयाः क्वय्यापिन्त ल्याः मखाः, छायाधाःसा परमप्रभुं इस्माएल्या मनूतयूत आकाशया नगुत थें यक्व दय्काबी धकाः बचं बियादीगु खः।

24 सस्याहया काय् योआबं मनूतयूगु ल्याः खायेगु ज्या शुरू याःगु खः, अयत्नं वं व ज्या पूरा मया। थ्व ल्याः खायेगु ज्याया कारणं परमेश्वर तंचायाः इस्माएल्यात सजाँय बियादिल। उकिं मनूतयूगु ल्याः दाऊद जुजुया इतिहासय् मच्चः।

जुजुया सम्पत्ति जिम्मा काइपिं

25 जुजुया धुकूत अदीएल्या काय् अज्मावेतया जिम्माय् खः।

देशयागु, शहर-शहरयागु धुकूत, गांयागु धुकूत व किल्ला-किल्लायागु धुकूत उज्जियाहया काय् जोनाथनया जिम्माय् खः।

26 देशय् बुँज्या याइपिं कलूबया काय् एस्त्रीया जिम्माय् खः।

27 दाखया क्यबत रामती शिमीया जिम्माय् खः।

दाखया क्यबय् सःगु दाख, दाखमघ तइगु धुकूया निंति शेपेमी जब्दीया जिम्माय् खः।

28 पच्छिमपाखेया क्वय् लाःगु इलाकाय् दुगु जैतून व अन्जीर स्वयेगु ज्या गेदेरी बाल-हानानयागु खः।

चिकं तइगु धुकू योआशया जिम्माय् खः।

29 शारोनया ख्यलय् च्वंपिं सा-द्रुहंत शारोनी शित्रैया जिम्माय् खः।

ब्यासिइ च्वंपिं सा-द्रुहंत अदलैया काय् शाफातया जिम्माय् खः।

30 ऊँटत इश्माएली ओबीलया जिम्माय् खः।

गधात मेरोनोती येहदयाहया जिम्माय् खः।

31 कैच्वलय् हग्री याजीजया जिम्माय् खः।

दाऊद जुजुया थःगु सम्पत्ति थुपिं हे हाकिमतयूगु जिम्माय् खः।

दाऊदयात सल्लाहबीपिं मनूत

32 दाऊदया कका जोनाथन छम्ह सल्लाह बीम्ह, बुद्धि दुम्ह व शास्त्री खः। हक्मोनीया काय् यहीएल जुजुया काय्पिन्त स्वइम्ह खः।

33 अहीतोपेल जुजुयात सल्लाह बीम्ह खः। अरकी ह्शै जुजुया पासा खः।

34 अहीतोपेलया लिपा बनायाहया काय् यहोयादा व अबियाथार सल्लाहबीपिं जुल। योआब जुजुया सेनाया सेनापति खः।

28

दाऊदया देगः दय्केगु तयारी

1 इस्राएलयापि सकल हाकिमतयत् दाऊद जुजुं यरूशलेमय् मुनेगु आज्ञा बिल। उकि कुल कुलयापि नायःत, जुजुया सेवा याइपि पुचः पुचःयापि कप्तानत, द्रुःछिम्ह व सछिम्ह सिपाईया कप्तानत अले जुजु व वया कायपिनिगु फुक्क सम्पति सा द्रुहं स्वइपि हाकिमत, दरबारयापि भारदारत, बहादुर मनूत व मू मू सिपाईत यरूशलेमय् मुन।

2 अले दनाः दाऊद जुजुं धाल, “हे जिमि दाजुकिजा व थः मनूत, जिगु खँ न्यँ। जिं परमप्रभु परमेश्वरया बाचाया सनूया नितिं, परमेश्वरया पाउदानया निति न्ह्याबलें दयाच्चनीगु छगू देगः दय्केगु इच्छा यानागु खः। अले जिं व दय्केत तयारी नं याना।

3 तर परमेश्वरं जितः थथे धयादिल, ‘जिगु नांया निति छं देगः दय्के खनी मखु, छायाधाःसा छ लडाईं याइम्ह मनू खः छंगु ल्हातं यक्व हि बाः वये धुंकूगु दु।’

4 “परमप्रभु, इस्राएलयाम्ह परमेश्वरं जिमि अबुया फुक्क परिवारया दथुं जितः इस्राएलय् शासन यायेत ल्ययादिल। वय्कलं यहूदायात नायःकथं ल्ययादिल, अले यहूदाया कुलं जिगु परिवारयात ल्ययादिल, उगु परिवारं जितः कयाः इस्राएल न्यंकयाम्ह जुजु दय्केगु वय्कलं इच्छा यानादिल।

5 वय्कलं जितः यक्व कायपि बियादिल अले वय्कलं इपि मध्ये सोलोमनयात परमप्रभुया राज्य इस्राएलय् शासन यायेत ल्ययादिल।

6 परमप्रभुं जितः धयादिल, ‘जिगु देगः व चुकत दय्कीम्ह छिमि काय् सोलोमन जुइ। जिं वयात जिम्ह काय् जुइत ल्ययागु दु, अले जि वया बौ जुइ।

7 वं आः थें होश यानाः जिगु फुक्क नियम व आज्ञा मानय् यानाच्वन धाःसा जिं वयागु राज्य न्ह्याबलेंया लागि पलिस्था याये।’

8 “उकि जिं छिमित फुक्क इस्राएल व परमप्रभुया खलकं खंक व झी परमेश्वरं ताय्कः थ्व जिम्मा बियाच्चनागु दु – परमप्रभु छिमि परमेश्वरयागु उजं होशियार जुयाः मानय् या। अले छिमिसं थ्व भिंगु देशय् अधिकार याये फइ। अले थुकियात न्ह्याबलेंया निति छिमि सन्तानयात सर्वयकथं बी फइ।

9 “हे जिमि काय् सोलोमन, छं थः बौया परमेश्वरयात म्हसीकि, अले तनमनं वय्कःया सेवा या। वय्कलं झीगु फुक्क बिचाः व इच्छा स्यू। वय्कःयात माल धाःसा छं वय्कःयात नापलाकी, तर छं वय्कःयात त्वःतल धाःसा वय्कलं छन्त न्ह्याबलेंया लागि त्वःतादी।

10 परमप्रभुं थःगु पवित्र देगः दय्केत छन्त ल्ययादीगु दु धइगु खँ छं सीकेमा। उकिं साहस यानाः उगु ज्या या।”

11 अले दाऊदं थःकाय् सोलोमनयात देगःया दलान व उकिया छँ धुकू, कःसि, दुनेया क्वथात व प्रायश्चित यायेगुथाय् दुगु तच्चकं पवित्रगु थाय्या नक्सा बिल।

12 वं थःम्हं बिचाः याःगु चुकत, उकिया प्यखेरं च्वंगु क्वथात, परमेश्वरया देगःया ज्वलंत व परमप्रभुयात छाःगु देछात तइगु क्वथाया नक्सा नं बिल।

13 दाऊदं वयात पुजाहारीत व लेवीतयगु ज्याया बारे, परमप्रभुया देगःया सेवाया फुक्क ज्या व देगलय् छ्यलीगु फुक्क थलबलया बारे उजं बिल।

14 थीथी कथंयागु सेवाय् छ्यलीगु लुँया ज्वलंया नितिं लुँयागु तौल व थीथी कथंया सेवाय् छ्यलीगु वहःया ज्वलंया नितिं वहःया तौल वं क्वःछिना बिल।

15 वं लुँया त्वाःदेवा व उकिया मत थलयागु नितिं व वहःयागु त्वाःदेवा व उकिया मत थलयागु नितिं माःगु तौल क्वःछिनाबिल।

16 छायेहःगु मरिया छगू छगू तेबिलया नितिं लुँयागु तौल व वहःयागु तेबिलया नितिं वहःयागु तौल वं क्वःछिनाबिल।

17 वं काँटा, छावाकिगु बाता व कस्वायागु लागि भिंगु लुँयागु तौल अले फुक्क लुँ व वहःयागु खोल्लाया नितिं माःगु तौल क्वःछिनाबिल।

18 गुँगु थनेगु वेदीया नितिं नं भिंगु लुँयागु तौल वं क्वःछिनाबिल। पपू चक्कंकाः परमप्रभुया बाचाया सन्यात त्वपुइपिं लुँया कस्बतयगु रथ दय्केत नं वं नक्सा बिल।

19 दाऊदं धाल, “थुपिं फुक्क परमप्रभुयागु ल्हातं हे दय्कूगु नक्सा खः, थ्व नक्साया फुक्क छता छता खँ वय्कलं जितः थुइकादीगु दु।”

20 हानं दाऊदं थःकाय् सोलोमनयात धाल, “बल्लाः व साहसी जुयाः थ्व ज्या या। ग्याये मते, नुगः क्वतुंके मते, परमप्रभु परमेश्वर, जिमि परमेश्वर छनापं दी। परमप्रभुया देगःया सेवाया नितिं फुक्क माःगु ज्या छं पूरा मयातले वय्कलं छन्त ग्वाहालि बियाच्चनी, वय्कलं छन्त त्वःतादी मखु।

21 परमेश्वरया देगःया फुक्क ज्या यायेत पुजाहारीतयगु व लेवीतयगु पुचः थन तयार दु। छंगु फुक्क ज्याय् लय्तातां छन्त ग्वाहालि बीपिं ज्या सःपिं कारीगरत तयार दु। अले हाकिमत व फुक्क मनूतय्सं छं छु धाल व हे याइ।”

29

देगः दय्केत छाःगु देछा

1 अनंलि जुजु दाऊदं सकल मनूतयत धाल, “परमेश्वरं ल्ययादीम्ह मनू जिमि काय सोलोमन खः, तर व ल्यायम्हचा हे तिनि, अले वयाके अनुभव मदु। थ्व ज्या तःधं, छायाःसा थ्व देगः मनूया लागि मखु परमप्रभु परमेश्वरया निति खः।

2 जिं फयांफतले जिमि परमेश्वरया देगःया लागि माःगु सामान ज्वरय् यायेगु कुतः यानागु दु – लुँ, वहः, कैय, न, सिँ, मू वंगु थी व रत्नत, छायापिये याइगु थीथी रंगयागु ल्वहंत व यक्व दुरु ल्वहं थन दु।

3 “थःम्हं मुंकागु थुपि फुक्क सामान बाहेक जिं थःगु धुकुति लुँ व वहः बियागु दु, छायाःसा जिं थः परमेश्वरया पवित्र देगःयात माया याना।

4 जिं १०० टन श्दु लुँ व देगःया अंगः पिने भुनेत २४० टन भिंगु वहः बियागु दु।

5 जिं लुँ व वहलं दय्कीगु सामान व ज्या सःपिं शिल्पकारतय्सं दय्कीगु फुक्क मेगु सामानया लागि लुँ व वहः बियागु दु। आः परमप्रभुया लागि देछा छायेत सु सु तयार दु?”

6 अले परिवार परिवारयापि नायःत, इस्राएलया कुल कुलयापि हाकिमत, दुःछिम्ह व सछिम्ह सिपाइँतय् कप्तानत, अले जुजुया सम्पत्ति स्वइपिं हाकिमतय्सं

7 थथःगु इच्छां परमेश्वरया देगःया निति १७० टन स्वयाः अप्वः लुँ, ३४० टन स्वयाः अप्वः वहः, ६२० टन ति कैय व ३,४०० टन स्वयाः अप्वः न बिल।

8 सुयाके सुयाके मू मू वंगु रत्नत दु इमिसं उपि रत्न परमप्रभुया देगःया निति गेशोर्नया लेवी कुलयाम्ह यहीएलया ल्हातय् बिल।

9 नायःतय्सं उपि सामान थथःगु इच्छां परमप्रभुयात ब्यूगु खः। इमिसं दुनुगलनिसें परमप्रभुयात ब्यूगु खः। नायःतय्सं अथे देछा ब्यूगुलिं मनूत तसकं लय्ताल। दाऊद जुजु न तसकं लय्ताल।

दाऊदया प्रार्थना

10 अले दाऊद जुजुं सकल मनूतय् न्ह्यःने परमप्रभुया प्रशंसा यात। वं धाल, परमप्रभु जिमि पुर्खा इस्राएलया परमेश्वर, छिगु प्रशंसा न्ह्याबले जुयाच्चनेमा।

11 हे परमप्रभु! महिमा, शक्ति, गौरव व वैभव छिगु हे खः, छायाःसा आकाश व पृथ्वीइ छु छु दु व फुक्क छिगु हे खः। हे परमप्रभु! राज्य छिगु हे खः, अले छि फुक्कसिया शासक खः।

12 धन-सम्पत्ति व इज्जत छिगुपाखें हे वइ। छिं हे फुक्कसित शासन यानादी। बल व तागत छिगु हे ल्हातय् दु। छिं न्ह्याम्हय्सित नं तःधंम्ह व बल्लाःम्ह दय्कादी फु।

13 आः हे जिमि परमेश्वर, जिमिसं छितः सुभाय् देछाय्, अले छिगु महिमां जाःगु नांया प्रशंसा याये।

14 थुपि फुक्क सामान जिगु व जिमि मनूतपाखें वःगु मखु। थुपि फुक्क सामान छिं बियादीगु देछा खः। थुपि सामान छिगु हे खः। जिमिसं ला लित बियागु जक खः।

15 जिपि ला जिमि पुर्खात थें कर्पि व विदेशी खः, जिमिगु न्हि थ्व पृथ्वीइ किचः थें बिनावनीगु, जिमिगु निति आशा हे मद्।

16 हे जिमि परमप्रभु परमेश्वर, छिगु पवित्र नांया छगू देगः दय्केत जिमिसं थ्व धन मुंकाःगु दु, थ्व फुक्क छिगुपाखें हे वःगु खः, छिगु हे खः।

17 हे जिमि परमेश्वर, छिं छम्ह छम्हय्सिगु मन स्वयादी धकाः जिं स्य्, विश्वास बहःम्ह मनूत खनाः छि लय्तायादी। थुपि फुक्क जिं विश्वास बहःम्ह जुयाः दुनुगलनिसें थःगु इच्छां बियागु दु। थन मूपि छि मनूत छिथाय् थःगु देछा हःबलय् लय्ताः, व जिं खनागु दु।

18 “हे परमप्रभु परमेश्वर, छि जिमि पुर्खात अब्राहाम, इसहाक व इस्राएलया परमेश्वर खः। थः प्रजाया मनय् थ्व इच्छा न्ह्याबलें दय्कातयादिसँ अले इमिगु मनयात थःपाखे सालादिसँ।

19 जिमि काय् सोलोमनयात छिगु फुक्क आज्ञा, व्यवस्था व विधि मानय् यायेगु व छिगु देगः दय्केगु मन बियादिसँ। छिगु देगः दय्केत जिं थुपि सामान ज्वरय् यानागु दु।”

20 अनंलि दाऊदं मनूतय्त् डाल, “परमप्रभु छिमि परमेश्वरया प्रशंसा या।” अले सकल मनूतय्सं परमप्रभु थः पुर्खाया परमेश्वरयात प्रशंसा यात अले परमप्रभु व जुजुयात हनाबना बीत बैय् तक छ्यं क्वछुकल।

सोलोमन जुजु जुगु

21 कन्हय् खुन्हु मनूतय्सं परमप्रभुयात बां बिल। इमिसं परमप्रभुयात होमबलि छाल। इमिसं द्रुःछिम्ह द्रुहं, द्रुःछिम्ह भ्याःचा, द्रुःछिम्ह मचापि भ्याःचा छाल। इमिसं त्वँसाबलि नं छाल। अले इस्राएलया निति मेमेगु बलि नं छाल।

22 उखुन्हु इमिसं परमप्रभुया न्ह्यःने लय्लय्तातां नयेत्वने यात।

अले इमिसं दाऊदया काय् सोलोमनयात निक्वः खुसी जुजु दयकाः वयात परमप्रभुया न्ह्यःने शासक जुइत व सादोकयात पुजाहारी जुइत अभिषेक यात।

23 थुकथं सोलोमन थः बौ दाऊदया गद्दीइ च्वन। उगु गद्दी परमेश्वरं पलिस्था यानादीगु खः। सोलोमन तसकं ताःलात। इस्राएलयापि सक्सिनं वयागु आज्ञा मानय् याइगु

24 सकल हाकिमत व सिपाईत व दाऊद जुजुया मेपि काय्पिन्सं नं सोलोमनयात जुजुया अधीनय् च्वनीगु बचं बिल।

25 परमप्रभुं सोलोमनयात इस्राएलीतय्सं खंक हे यक्व थकयादिल। परमप्रभुं सोलोमनयात व वैभव बियादिल गुगु व स्वयाः न्हापा इस्राएलय् राज्य याःपि सुं जुजुयात ब्यूगु मदुनि।

दाऊद सीगु

26 यिशैया काय् दाऊदं सारा इस्राएलय् राज्य यात।

27 इस्राएलय् वं पिइदँ राज्य यात। हेब्रोणय् वं न्हयदँ व यस्शलेमय् स्विस्वदँ राज्य यात।

28 ताःई तक म्वानाः धन व नां दयकाः बुरा जबलय् दाऊद सित, अले वयागु थासय् वया काय् सोलोमन जुजु जुल।

29 दाऊद जुजु जुयाचवंबलय् जूगु फुक्क खँ शुंनिसें लिपाथ्यंक, शमूएल अगमवक्ताया इतिहास व नातान अगमवक्ताया इतिहास व गाद अगमवक्ताया इतिहासया सफुलिइ च्वयातःगु दु।

30 अले वं गथे यानाः शासन यात, व गुलि बल्लाःम्ह खः, अले इस्राएल जाति व वया प्यखें च्वंगु राज्यलय् छु छु जुल व फुक्क खँ नं च्वयातःगु दु।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7